

# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Santoleaksat ke 2023

14<sup>e</sup> otuk

Kotava, tela tamefa golerava  
Va ina kosmac !!



Sulem ke  
naelafa lenteka



Ketavaxak dem suterat

Raymond Radiguet

ORETLIK  
KOE ALTO

Derpui (1922)

Kotava, tela tamefa golerava







# Sulem ke naelafa lenteka





## Sulem koe naelafa lenteka...

---

1. *Koe gazaxo ke fent*
2. *Batakaf rupol*
3. *Noldaf goyol*
4. *Lempol*
5. *Dadjuga dem vwepaf oral*
6. *Brünnich tcubay*
7. *Lakroda dem aultap*
8. *Manyevol*
9. *Nudol dem aultap*
10. *Yavaf ipom*
11. *Tovukol*
12. *Rivebol*
13. *Gyrfalco flaweza*
14. *Noldafa bugimoda*
15. *Bedakol*
16. *Naelaf bresitol*
17. *Idatcol*
18. *Naelaf nankey*
19. *Eurasiaf krepayot*
20. *Naelaf percom*
21. *Faltalaridafa perca*
22. *Dadjuga dem blakerafe ge*
23. *Valpok*



## Koe gazaxo ke fent

Koe lentef nael, Arktika welfa tir datafa opranafa bira lokon besana gan opruk ; ewala tigid, dum sibi- rafa tursia isu kanadafa is Nunaata tisa tela logijafa ewala ke tamava. Arktika wale lentefa pakava ke Europa is Asia is Amerika tigr ; bat tadavaf seg va arktikafu naelafu ivamu koanamar ise va naelafa lenteka anamezar.

Icle tandeon, awaltara dun dur. Fentugalaf miel tir abrotcipaf, afiz trelapaf : voluca remi idulugal. Koe dye nael, to ant tanoy mielcek az tanoy afizcek tandeon tid, ise tevaksaton jijad !

**Fentafa wegona.** Sulemeem ke bata golapa va nustaf lidawickaf gropeem goliker, i va gropeem adalaf gu omafa yanka ( tulong koe Verxoyansk koe ronefa Sibira, yanka vas  $-68^{\circ}$  zo koverteyer ) is muvarekama. Toloya patectoyinda vadjed. Taneafa tir vaf tapanaf mit nume tankomapafa. Toleafa tir loon gedrafa kiren sid tir kev rontion muta is dem ruxeem. Voxen larde sidom remi tanda dun gutapawer ( tapsid ), pune aal koe anton zeitafo xo atrid. Koe datafa *taiga* aala dem pailtapale, aal ontinon somevonewed, isen ontime ke telyon ke ruga loon lenteon tir vas anton 30 ik 40 cm-. Pinaf ruxeem ton lotaneakaf tazuk ( berdava is abic tij ) koe loplabafa gola anton atrir.

**Jonksevafa werda.** Fentugalon, werd is luc leve nolda ke kretsiskafa is letafa ruga lajublid. Voxen bak liaf arktikaf idulugal ( toloy ik baroy aksat ) moion levgon, ant welmafa bada ke sid gritaped. Abicedje ruxa vonewed ise imwed : va ksevafa edaveracka tcoket edje kadulafa ok raltadukafa dekumpa is suzitca is batakap vibong rumbed. Enga ke aejada va kerafa kretsa zovdad isen lesokoraf onduk ke zelimo vas kiltatum vektad. Voxen ruxinda lajuzaleyesa gu lugavaf gropeem ke naelafa lenteka vugote tid. Batdume ruxeem tir copaf : moe Devon ewala ( Kanada ), anton mon 100 imwaruxinda krulded, solve mon 4200 koe Franca tid !

**Loote lamasik.** Opranafa welfa tir tel lovolluvedaf patectoy ke naelafa lenteka. Kore tir ind ke batakap rupol is megol is spedol is kabay voxis dat niskiskaf sulem isu tavomo tadleso va spolck. Neken meki zveri banlize elupkon blir isen mek ensidayaf moukol zo kakever. Ruga idulugalon kapbureon tir blisu viaku. Kore moukol abicote tid voxen lanyona katca dum tovukol tid dem jontik olkik. Zveri ropatani vas yona celema cugote tid lamasi ise abdi fentugal maltalad aze va solumapa vas jontikviele yone decitoye metre kal luvedafa coyunta remtalad.





Ant abica katca dum gijafa razama is bugimoda is lanyona libakolinda lizukon lajorembliid. Darpeon geon, katcota laumar : bar-sanoya katca moe geefa ewala ke Novaya Zemlya ( valente Rossia ) az tev-sanbaroya koe aalafa ruga ke tadava. Taiga aala vas lokulaf sulemeem luxeon ruldar kiren lidawicka tir leon plabafa : frofanafa gu moukol ( sebadadunolam is vimkol is konaka vesnolinda ) is jontik atelatorik ( braniol is bruntol is djenol is idatcol ) is werdtorik ( bedakol is wocol is cpogol ).

Idulon koe nolda. Sulem ke naelafa lenteka katcalon tid kalvekaf gu anameda lize blid. Nustuca ke fentugal vebar da deblitafa katca gu fent va int konakkane gonendad. Batdume koe taiga aala, lambey is nitca va fentugalaf miel arte erilt suxayan koe nolda bravon ice suka is tap tiskid. Tire valeve nolda vafa vas 10 cm-, yanka tir vas 5 ik 20° loeke dam tela diveon. Konaka ciestinda milinde askid, voxis lanyona proklaminda inton kosuxedayasa ko nolda liz tod goa arti sanoy ok tol-sanoy verast griawid !

Gevasa betawera. Koe naelafa lenteka, kseva dun betawed, dum jijacek ke afiz. Muvugalon, sulem va likera va fentugal egadad ; im ke moukol ok bruxeem ke zveri tuabrotcawer is tuekamawer. Naelaf bresitol is braniol is libakol is bedakol ba taneafa tapara vanpid ton aftapaf im. Volson idulugalon, inafa beretrafa ok flemafa jadifa uka gu tela ke sinafo irubaxo loon zo dojer.

Lyumara ta bli. Voldum rotisa folira, abic moukol koe naelafa lenteka fentugalud. Vaxe vesnol ke taiga aala, ant arktikaf werpol ( *Spermophilus* ) blis koe Kanada gitwerier, dum bilotol ke meftava. Arak ke moukoleem

tuke vaf myot is sumafa bada va fent divvawar oke blison valeve nolda milinde tovukol sokaskir.

Nekev plabapaf gropeem nope noaf is duref fent, sulem is ruxa ke naelafa lenteka lajurembliid ise tandeon nazbalked. Sinafe tame vas opranafo letaxo ok felkus blatak vektar. Voxen kota katca al anamraver kane va rodadin robeem gomalsaver kore rob enwe abicote tid.







## Batakaf rupol

**En gulik.** « Jiomaik ke Arktika » ( *Ursus maritimus* ) sotir gijarotipaf nume va kretsakiraf spedol ( *Pusa hispida* ) tildes ok gaeleksas tic lavek rovangir. Dendason va eroyafa iniara kev oria, va kosik balier aze mo opra vere ticapter, kore aldo tir vas 80 decitgrame ok loon isen abrotce vas mon 1.50 metre ! Batakaf rupol va logijafa wivga dere grudilfur : i va lukastkiraf spedol ( *Erignathus barbatus* ) dis va aldo vas 200 ik 400 kg- is abrotce vas 2.50 ik 3 m-. Voxen kotviele katecta sokir, pune in vanpir awalkodatorik. Nekev granafa brucka, tir tuzapaf ise onsetses va kona wivga senyesa moe opra, va beta dampa grupimpavantar ise meka-tcalanon abdulnir aze welvipeson vaon iper. Va kon spedol ileon tigus arte 2 ik 3 km- moe opra grutcaluter.

Batakaf rupol tir keldupus is trabiangaf koe fentunafa lava lidam moe opruk. Idulugalon viele opruk arbewer, pune va siday artpujer lize va koteca voja gimalestur, voxis jontik sebadadunol is birafi zveri. Kle dere tir ruxafamaf ! Va bat gijapaf govitol remi tanda vegungon ice kanadafa tursia oku siberiafa oku nunaatafa rokakevet. Ko siday vugviele ilon abdulnir, voxen arte 110 km- mal bira koe Alaska is arte 320 km- koe Sibira ixam zo trasiyir, numen batcoba va inafa acagisuca art solumapa wazder.

**Va fentugal koe idul.** Gubeon, batakaf rupol va elupkafa luva me dadir, vaxe rupolya sosuxasa va brava koe noldazuvda tori fentugal. Bata luva moe ezasa opra vols krimta ok kona ewala sometigir. Wori abica radeaca tid. Koe Nunaata, tire 70 ik 80 % ke rupoleem volkare ikra ok klaa fentugalon gelbed kotviele mutapa dur. Voxisen rupolya ware jotarsafa gu nazbalkera ( trabe tisa leon balemrafa ) tid keldusa dum sulemye. Ikrakruca ke rupolye koe Nunaata ba anyustda sokir. Koe Novaya Zemlya lente Rossia, walikrara wali bareaksat is anyuste-aksat dilized.

**Abrotce** : 2.00 ik 2.50 m- ( is ault vas 20 cm- ).


**Aldo** : 400 ik 1000 kg-.

**Blirugal** : 33 tanda koe gralomexo.





Bat baroy rupol tid vas mon milaf lum. Neke to gadikya is toloy ocam tid. Ban va ina fu bulud kire tid klaaf vas tanda is acku. Voldum rupolye givunkese koe ruga, yasa poka krimta sye zavzagid ise va bira me illanid.



Kotca ke abdueinia gitor lumafa vas tevoye ik perye decemeametre ( kene livoda ) ise sotir ana. Batakaf rupol va trelapaf oblakeem sodir ; batcoba ape tir zalera gu fent kiren drasura va idul batinde zo kastad. Rijust vas balem-san-toloya talga ruldar.



Fentugalafa luva ke rupolya tir vizuafa is abrotcafa vas mon 1.80 metre is ontinafa vas mon tanoye metre ise remo plor akintakoraf vas 2.00 ik 2.50 metre gu divexo levgol, i remo plor aretlayan gan sulemya. Ina sizi santaneaksat va int kobuder aze kali tena ke balemeaksat di zavzagir. Tanoy ok toloy oc wali taneaksat is balemeaksat di koblid.

Batakaf rupol sotir donaf pujesik, welmon ok midon. Kalieon gu 30 ik 35 decitmetre bartiveon grupabdupujer. Kale 100 km- mal lopokefo oprukxo ixam zo dizveyer nume wetce biraf sulem zo rotorigir. Moe xetaf sid kalieon gu 4 decitmetre / bart- va int liziwer ise dace gu cugon 15 km- / bart- viele tcepar.







## Noldaf goyol

**Goyol ( *Anser caerulescens* ), faltaf goyol isu batakap.** Va faltaf goyol valente Kanada is koe Alaska mali konaka sanda loloon trasit ; batakap goyol luxeon illaumad : tulon moe Baffin ewala, faltaf goyol va 80 % ke sanelia lizukon kaatoed ! Bat goyol dis va lukoptlerkaf bruxeem ukakiraf gu falte va tigixo ronon dun wad ; ede wan abdufid, pune va batakap goyol koe jontika gola ke naelafa lenteka co ikarundatad. Wori toloya apta va sint grupaotced, voxen ota dem aotcafa tolonga tir axafa kiren kon goyol va milksevaf dositik sokabdualbar. Lazava ke titaytura ke batakap goyol zo grupensed ise rotid ke sinaf nazbalkesis zoneem.

**Abrotce :** 63 ik 76 cm-.

**Aldo :** 2.3 ik 6 kg-.

**Wiltade :** 1.50 m-.

Noldaf goyol va toloya apta sodir : batakafi zveri dem ebeltafa wiltotsa; solve faltaf goyol tid dem antafa batakafa taka. Ison, konaka amidacapa tid : logijaf goyol moe ewaleem ke arktikafa Kanada is Nunaata begamud lize kotak tir vas mon toloy vuntoy goyol ; lepinaf goyol luxeon tid lok vas toloy ik baroy celemoy olkik. Kot goyol sotir lamas ise va ruga radimi almotcera wali pereaksat is anyuste-aksat jovler.

**Tanara va po askir.** Kotviele goyol ton boniaxopo begamur, pune va volnik me craker. Moe Wrangel ewala lentrone Sibira, 400000 bati zeri tandeon nazbalked isen va 100 begama fuxe tanoy decemiray patat ! Wivgasik ( naelaf bresitol is gijafa razama is lakroda ) lente otapa dimelanid ise va cwsa goyolya is sinaf atoeem voldjuvangid. Voxen bumafa tolonga ok tumam keskoton meromalplatis va ruzadera co xaked. Wori begamuson drume noldafa bugimoda tisa gijarotifi fliwafi zveri, lan goyol va keskotafa nendara trasid.






Talteon noldaf goyol ton batakafa nesida bak intafa lamara. Roneon goyol va ruga vamootalad abdida va int fu aykad. Dimtalon kal fentugaluxo tigiso varone Tanara-sokeem kale lentefa krimta ke Mexika bira, va mon baroy aksat ( bareaksat ik toza ke



teveaksat ) al olegayad. Bak bat cadim, va reca is taya ginobad lize va zaipolk jovleyen bak muvugal malestud.

Bat jotaf goyoloc dositan gan gadikeem ba klaa vas mon 50 viel oxam grutitatalatad viele intafa saya gu bruxeem al zo ikaplektur, i gu batakafa is lukoptalerkafa bruxa. Trakut da yasa kali dimtalar ko ruga va int wan tanar, direilanon, trabe arti 10 aksat.


Ticeon batakafa nesida ; titeon faltafa nesida. Domeem ke oral ( talteon ) sotir dem olgaf nolaf toaz. Sin va mulera va werd is toa is anga is berdava is tij zanudad, i va tor gestus va goyol bak idulugal. Baroy abduegelt ( roneon ) tid tananaf gu vaf piv.



Noldaf goyol bumon ok dene boniaxopo va begama askir. Begama tigisa moe juro tir suxoma udayana gu werd is tij is bruxa is lukoptafa saya. Titi pereaksat, kadimi arttalar va nazbalkexo, goyolya va 4 ok 5 ato atoar aze remi 23 viel di cwar.







## Lempol

**Meftava dem cot.** Lempolye ( *Odobenus rosmarus* ) va gamiafo nek tuzafo alto dir isen aldo fereon tir vas loon tanoy ik dace toloy decitor. To logranaf moukol ke arktikaf bireem vaxe mekol tir ! Bata meftava dem cot va sinka vas 45 kg- ( nelkon tulwadunol is lona-dunol ) vieleon gikoartokar. Sumafa bada vas icle 7.5 cm- va alto gu fentunafa lava sonendar.

Kare xo, lempol tis yastaf govitof valente Pacifika welfa isu Atlantika rotir deblitus ok lamas. Mon kunoye lempolye moe lenteamerikafa krimta tandon zavzagid voxen tol-kunoye are gee Bering vedil milinde askid. Kore bat pwertaf moukol valevo opruk grupujer, pune va oprukxo bak muvugal ko geon Bering bira wale Sibira is Alaska sye ilpujer.



**Eyaf sulem.** Lempol koe lavok djukablir. Tildeteson mo ezasi opraki anton divpujer ; wori idulugalon, remi tanoy aksat is acku moe kona piluda ke Atlantika welfa diliodon gijonvieler. Tis eyaf sulem, va siudapa dem dat tum tadler, i dem tum ruldass vas konak sanoy iku dace decemoy olkik. Lanu viaku dace rotid vas yona decita. Lempolya dositana gan oceem poke lavok va sint katanad, solve lempolye va xopo sume bira kereled. Seotatason va lokiewafa runda, sulemye fereon mijed nume bal koboda va abrotcaf talgaveem meklabuson faved. Yorda ke ticef myasteem ware zo grupenser. Kas lempol, fasiason va biraludev milinde batcoba mali toloya decemda is acku dun zo kalir, trasitison va sinka vaon zanudar ? Neken talgaveem arse tir darsackafa pilkomodasa sugda tove rumeik ke varafa tamava !

**Abrotce** : 4.5 m- ( cugon icde lempol ke Pacifika welfa ).

**Aldo** : 1200 kg-.


**Blirugal** : cugon 43 tanda ( lempolye ).





Lempol estobar enide va sinka mal biraludev di divokser. Kas va kuld kan talgaveem maltiolter inde batlize wit ? Batinde batvieli trakuckut voxen batcoba me al zo wazder.

Lan aptacik dace trakud da in va malgestura co somezanudar. Kottode mil govitol faver enide mo opraki ticapter ( talteon ) oke va kon millkatcik rwamar.



Otsa ke pezay tir udanafa gu abrotcaf tritapaf imolk vas 10 ik 12 cm-. Mon 300 ik 350 imolk bene kot kril ke gariza tid. Kota talgava enwe tir ticef myast. Tir abrotcafa vas 80 cm-. Talteon : otsa ke radimeinia ; roneon : abdueinia



Bak alubeaksat, lempolya va tanoy oc ginazbar, i va oc abrotcaf vas 1.30 m- doon zavzagitis remi mon barda. Radimion, gin walikratar. Kona sulemya arti mana barda loviele nazbalker voxe dile me : koe Sibira, mon lok ke lempolyeem va oc oxam balemdeon inc nazbar.

Binjol koe bira is batacaf rupol moe opra va elupkafa dratcera va lempol tadled. Binjol ( valeveon ) va lempoloc dalon gidifur voxe va milgik dere wupesir. Batacaf rupol va lempoloc dere konarir isen ant milgik surteson rodefacagir







## Dadjuga dem vwepaf oral

**Tutrovgara va yordeem.** Dadjuga dem vwepaf oral ( *Phalaropus lobatus* ) tir loftadunolam blis aname lentef nael, koe ruga ke Europa is Asia is Amerika. Bat sulem va katcalafa kira atoer : dene jontika zverifa katca, zveriye va loksevakiraf bruxeem sodir ise stokeson va ingaxa fuglar ; zveriya luxeon zavzar levgasia ise va spupiaf bruxeem sodir ise va lok ke cwara ravaladar. Voxen dene dadjuga dem vwepaf oral, to zveriya sotir gijafa loon dam zveriye ise va loon jebesa kseva kabdunedir ise gifuglar ; ison mali atoara, va koncoba mea viunsur ise isker da dadjugaye va atoeem di cwar aze va oceem nyapeter !

**Abrotce** : 19 cm-.

**Aldo** : 35 g-.

**Wiltade** : 35 cm-.


**Blirugal** : icle 5 tanda koe tuwava.

Dadjugeem va fentugal grocelon ice taltefa krimta ke Geefa Amerika ok vagerone India welfa male Aden pargalu is krimta ke Barata kale tela ke ronefa Afrika tiskir. Siuda ( cugon vuntoyi zveri ) koe toleafo bato fentugaluxo zo dizveyed.


**Tan « zolonik » ke lamara.** Dadjugaya tici teveaksat ik titi pereaksat taneon maltalad. Dadjugaye kadi-mion silukon askid, jovleson va oceem men grutalas. Dimtalara bak bareaksat kali alubeaksat dilizer. Dadjuga dem vwepaf oral kle tir ke loma dem zolonafi lamasi zveri, mielon rodefexules va yone decitoye decitmetre vamoo bira is tadava ; vas 350 decitmetre bad 24 bartiv ! Dadjugoc kal intafo koblixo luxeon grudimtar.

Idulugalon, dadjuga dem vwepaf oral va toka is bezuk ke valpok ok ara sidayafa ok lavedafa beza voxis lonadunolam maestur. Fentugalon, levaykat da ina va spolkaft sulemam ezas moe lavek ape raweyar.






Bata dadjuga gan befotlafa flaweza su zo dilfur. Taneon al lasugotcer voxe me tcedeyer. Flaweza va int su aykar aze a ina kalion fu basbruxar abdida di estur. Voxe dum gilton, va wilteem bene penigot ( tana niska koe ast ) fu isker.



Dadjuga dem vwepaf oral gan naelaf bresitol guines va intyono ato dere zo dratcer, is gan lakroda is yona lakrofa katcapa vangisa va zverioc men rodetalas.



Pivot tanas va gelteem va pujera tufakad. Vamouon, oral tir tigapaf kapbure tel ke aryona katca ke dadjugeem. Inafa otsa tir titon livamafa. Wilt tir abrotcaf is uulaf dum tel ke jontik ipomdunolam ke omega oku loftadunolam.



Koe bata begama, atoara wan dilizer. Gubeon tir dem balemoyo ato daykayana bak teveaksat. Begama tir suxomama stornayana gu abic werd oku berdava ; xakola tir vas 7 ik 10 cm-. Dadjugaya is dadjugaye va konaka begama tugadiad azen bantol va begama ke atoara tenuker.

Moe lava, dadjuga dum miluntuk ezar ! Kiren bruxeem ke jivot tir vapaf nume va tokodapa ke gael kagir. Zveri va ugalap moe bira ik uzda tiskir. Volpeteson va tor, dum onda ( sotre 40 ik 45 bangers fuxe verast ) banger.







## Brünnich tcubay

**Kaiksanelia.** Moe Novaya Zemlya ewalatum kimon ice Sibira, tela toloya logijafa siuda dem *Brünnich tcubay* (*Uria lomvia*) va mon balemvuntoyi zveri tanton katanad ! Bati zveri moe yona nilafa raporafa grvida va sint flavad, i moe grvida rion zidafa is dile mantafa vas anton san-toloye decemeametre, ise va beta tambama ke krimtafa kiria ontinafa vas decemoye metre kereled. Tandeon, bak baleme-aksat ok alubeaksat, lorasu viaku dem tcubay millize begamur ; voxen xoeem arti balemoy aksat belon di zo jovler, kiren zverieem grocelon ice krimta gifentugalur. *Brünnich tcubay* koe Europa is Asia is Lentafa Amerika sye nazbalker. Va tanoyo ato sokatoar aze mo pist rontion aykar larde va atoxo somevegedur.

**Arpumapa.** Bato ato diso va mialukafo aldo vas 105 grame, tir vas mon 10 % ke aldocko ke atoayasi zveri. Voldum jontika ruyera, inaf tazuk me tatcer da ino rovodakeoyer. Volson akeoyera titi cwara tid jontika. Voxen darpe abdufira is atrira ke futik, empasa arpuma illaumad kiren mosxo ke ato arplekuwer. Cwatason, tcubay va ato mo pivoteem rundar. Zveriya is zveriye remi cwurugal vas barsanoy viel va sint dun ledunged. Remi baroya afta ke tira, tcubayoc gan tan milgik dun zo tuidular. Edeme nekev saya nope fent co awalker kiren inafa koefa yanka men tir belafa. Bak bata rekola, zverioc va aldo jontolar numen aldocko va 140 ik 150 grame artfir. Tcubayoc vas lokap va koblixo moe kiria me di bulud kire abdion al xonuked, tison kosaf gu fent ok lubera ok gralomeso lakropo. Naelaf bresitol sotis ar guinesik va zverifa sanelia, va rotartlanino ato estur. *Brünnich tcubay* kalion grutalar voxe golde trelapaf ault, drikon vere someroniarur.

**Abrotce :** 43 cm-.

**Aldo :** 1.2 kg-.

**Wiltade :** 70 cm-.


**Blirugal :** icle 10 tanda koe tuwava.





Ba baroya safta, tcubayoc va kiria bulur aze va tan gadik kes moe lavek is rozas lakevtalar. Men grutalackar neke ko vlarde ongir, dile ticu ontine vas konake sanoye metre, mo titefa kadoma ik ko bira luber. Sotceson is tegulason va wiltameem, va lubera tuviar. Rion zo bakar oke zo aytar kire tir bagaf ise va vafa sayafa bada sodir.

*Brünnich* tcubay va kabay dalon malestur : i va bakimi is bakido is aaltuk is bixedo. Grupujenyer ise va 40 ik 50 verast leve lavek rodetiskir ise kal titsuye vas 18 m. rotestobar. Pujeteson, va wilteem dekson zanudar milinde koe rid co talar.



Va aftafa conya rune oral katcalat, i va conya mekruldesa dene yavaf tcubay tis kosayafa katca. *Brünnich* tcubay va baroy gelt ( abduel gelt ) dem walef pivot anton dir. Toloy wilt tid abrotcackaf is uulaf neken sinaf welmot tir axaf kapbure lum ke zveri.



Trasira va toloyo ato dye milafo ke tcubay tir merotisaca, kore va konako decemoyo co rindet. Bata gedruca ta tcalutera va ato gan tcubay dimtalasi kal zverixo meinde nuyordar. Bata ra gan lanyona bagalara zo razdackayar.





## Lakroda dem aultap

**Tcordik ke bira.** Lakroda dem aultap ( *Stercorarius longicaudus* ) va man ikayolt riwecker kiren maninde fentugalon va pakap ke sinka levseotar : dure onseson va aryoni zveri ( lakro is lofta is krepay ) vieli sini va warzeks ke intafa onara tuleganon tere jovled. Tison tuzafa is kaliafa loon dam kosik, lakroda va vangira cugviele tceder. Batinde gilaskir nume en tir com kire me rodefonar. Bak rotaf cadim, bagon iltalason lamar : vamoe Guinea pargalu ( bwafa Afrika ) is dace loon geeon zo dizveyer. Lakroda bak alubeaksat ko arktikafa ruga dimtalar. Jontikviele millize dam daretandon di begamur. Batvieli inafa sinkarinda en koton zo betar : va sebadadunolam riwe tanon malestur, i va satcon tovukol bam rotadles va 80 % ke intaf wivgeem. Va vimkol is zverioc ( oc ke yona dadjuginda iku kipsayinda iku proklaci ) is beza is dace yona voja ke indiva ik aejada loplekur.

**Toloyo ato, dye.** Nazbalkera ke lakroda, dum tela ke bugimoda is barenda, va aultoves sebadadunol ruptecker. Kotviele man sulem tid abic, pune apu ke tolongeem me di atoar ! Voxen kotviele lakroda askickir, pune va toloyo ato dye di atoar. Neki ke bat askiks co tir nope inafa cwarinda : cwara aykason va ato moe pivot, va toloya runda anton jupar ! Ison, lakro va toloya cwasa pozla anton dir, i va jivotki lizu bruxa moi divatoara griiksantuwed numaze va iduldeara tufakad.

Lakroda dem aultap koe anamenaexo gibegamur : Skanda is Sibira is Lentefa Amerika voxis Svalbard is Nunaata.

**Abrotce** : 37 cm- ( is 17 ik 25 cm- ke aultbruxapa )

**Aldo** : 230 - 350 g-.

**Wiltade** : 90 - 94 cm-.






Wira va koni birafi zveri gralomesi va moukolam tir destara ! Neken lakroda dem aultap va tovukol malestur. Batlize mili zveri va baroy bat sebadadunol layates van tawaz su onser.



Voxen tan bat moukolam tir kalliansaf numen lakroda va tanoy artcek ke in askir. Arti logara, zveri va fixumu kum niskempa is meradayan imolk di putcegar.



Yolt ke lakroda dem aultap tir vey toloya bruxapa kaike ault, abrotcafa vas 27 ik 35 cm-. Oral tir demakirapaf. Brucka tir gemapafa ise va tela ke apsaka divrozar, i ke zveri ke bwafa bira. Inieem sotir pivotkiraf dum tel ke lofta.



Arti ocagugal vas 23 viel, toloy lakrodoc besanaf gu saya divatoad. Arti tanka ok tolka, va atoxo bulud ise art konake sanoye metre illanid, bravason valey cirdata ok dzopoka. Ba klaa vas 26 viel, parmon iltalad.

Lakroda me klabur da ato ok oc gu vanlanis ok vantalas lujdik kevrojur. Batlize naelaf bresitol kranaveson bagalar. Voxen zveri va kioxuca kev ayik dere exaksar ; estobason drumo inafa taka, va in battode lasugilplekur.







## Manyevol

**Ar yolt ke manyevol co tir moledjol.** Voxen nekev man yolt, manyevol me tir moledjaf atelatoraf sulem rokoartokas va jontikote sinka. Tire, vieleafe vace tir vas cugon 850 g- bad tol-san-balemoy bartiv ; ison manyevol tanvielon ok loon dile getiner ! Kotviele sinka tir aultovesa ( viele in va kon milgaf bedakol akoles ok bakayan ok tuacayan tulon al aykar ), pune me bedjindar voxe kosuxedason va atelaki lev nolda ok madason mo aal ( kire dekson gruticumar ), va eksa flavar. Bat « blotak » tid tcastaf moe tawavo vas mon sanoy decemiray. Ara vunda tir : manyevol va govitaf fled ke irubaxo alkejar ; tire for tir pinaf isen in va tcabanexopo welmotafo gu 125 ik 1500 km<sup>2</sup> kare wivgafe aultove olegar. Koe manyevolye va tawavo lickon rojur lize toloya ok baroya manyevolya rodo-irubad.

**Abrotce** : 70 - 105 cm- ( is 20 cm- ke ault )

**Aldo** : 10 - 19 kg-.

**Blirugal** : mon 13 tanda.

**Yasama.** Ant toloy ok baroy manyevoloc bak bareaksat ok balemeaksat koe luva tugadiayana leve trovgayan aal ok wale pistok ok koe fe gan gadikya koblid. Luva gu gamama is tij is rodaf werd zo udayar. Koe Norga bata brava, jontikviele suxayana koe noldazuvda ok kevtite kirama, va tanoy ok toloy erilt abrotcaf vas 5 ik 10 m- dikir. Oc remi baroy aksat zo vanvrodad aze ba klaa vas tanoya tanda, va wivgama oxam toz tcabaned. Wali tolda is balemnda silukon rodenazbalketed.

Manyevol tir gijarotif is govitapaf sulem, nek plaxaf is oblif vox dademon welvus. Fentugalon, va tol-sanoye ok bar-sanoye decimetre bad tanoy mielcek fereon rotexuler, satcon tcabaneteson va bedakol. Koe *taiga* lentefa aala ke Skanda is Sibira is Lentefa Amerika giblir, voxen ko ruga dile illanir ise va coyunta nobar lize noldabada tir vafa gu 50 ik 70 cm-ok loon.





Manyevol to bak fentugal va jotaf bedakol is cpogol ke ilanacek oxam vangir. Ban toloy sulem va 45 ik 75 fuxedecemaca ke inafa sinkara tadled. In va sin onser aze deksapon iper. Bak mil cadim, va libol dere malestur. Va vigrokaxa koe tcabanese ikse dace vumber. Voxe gu awalkoda ik xim ke idatcol va int dile tuvalear.

Vamoeon, manyevol mo bedakoloc welver aze agvudur aze aytar.



Manyevol va trelaf inieem dir, i va mantapafa inia dem abrotcapaf vitoda delapafa is livafa. Inaf abrotcaf myot tir lerkaf is loleon orikaf. Toloya oblaka tid anamkafa is pinafa vawale fleme. Dunol va bar-anyustoya talga dir.



Bat manyevol ken aal su ticumar enide wir kase ato ik zverioc koe betsava ke ulim co tid. Va mecoba al trasir nume mo rodafa gama grabler. Banlize pitcason ker : ede kona wivga pokolanir, pune wilupon titlanir oke moon ipeson grabler.

Manyevol nekev strokafa kerdela tir kaliaf is oblif. Koe lava ik moe sid ik koe aal tcabaner ise kare cadim va kabay ik zveri ik moukol ik altoxim malestur. Baroy manyevol vumbes va awalkoda ke bedakol ixam zo wiyid. Somestobar ise rion pujer.







## Nudol dem aultap

**Nyelik ke midafa estobara.** Koe Lentefa Amerika, lan nudol dem aultap ( *Clangula hyemalis* ) koe dona titsuyafa vas 55 ok dace 60 metre zo onayad !

Nekev lumam, bata nudolinda tir an estobasik ke zverieem ke naelafa lenteka. Tire wale 15 is 28 metre va int belapon gilevlavekar aze arti loon tanoya wexa dimgepoyter. Balte lani amidapafi zveripi koe mid loedje rodetiskid voxe va int leeke vanludevad. Bak estobara, nudol dem aultap kan inieem pujer ; neke kan wilteem vion tegulan dere malsaver, is kan ault stoken ta ape milbavara is vodjura. Va tolmomartaf tulwadunol ( gerlantek is xumiz is benevot ikz- ) is tulam is aboka mo ludev gralomer. Inafa malestura dalon sotir kum pinapaf sulem ; tulon va 1700 tulwadunol abrotcaf vas leon sanoye deciteametre koe uvoona ke lan nudol dem aultap trasiyit !

**Gronafa ksevarura.** Nudol dem aultap baron tandeon sokalmotcer. Kseveem ke bruxeem kle dun arapeniwer. Remi kot cadim, nudolye is nudolya tid aotceyena gu lerge ik ebelte ik batak, numen batcoba va keskotafa mastura nuravaldar. Wana ke amidaf bruxeem soe wan zo grupenser.

Kare cadim, nudol dem aultap va toloya patectoyinda nobar : va lavaxomo ke anamenaelafa ruga lize pokeon gibegamur, is va bira poke krimta tod dambafa lava lize gifentugalur. Koe Lentefa Amerika, koe Uzdapaxo gola dere fentugalur. Bata nudolinda tir tela loyavafa nudolafa katca ke ruga koe Nunaata lidam kanadafa Arktika is Sibira is Samia. Otacka vas tol-celemoyi zveri zo uldiner.

**Abrotce** : 40 - 57 cm- ( don ault )

**Aldo** : 600 - 1000 g-.

**Wiltade** : 72 cm-.





Talteon, tolonga dem nudol dem aultap ton fentugalaf bruxeem. Gralometeson va kabay, zveriye ( irsteon ) estobar aze kal welma ( roneon ) vanmiae aryone nudolye pokeon talase ticpujer.



Bata nudolinda gitir eyafa vaxeon bak cwarugal ise ton yonakam vas dile 50 zveri gilamar. Voxen xuton gu fentugalafa katararapa, koe Balta bira 350 000 nudol dace zo patayad.




Talason, nudolye gu aultap ( ticeon is titeon ) zo pilkomodar, solve nudolya ( irsteon ) vas aryona nudolinda vektackar. Nudol dem aultap tir kaliapaf vas 85 ik 115 decitmetre fuxe bartiv.

Tigiso poke tourkama ok ujiwa, atoxo ke nudol dem aultap tir suxoma senuyuna koe werd ik tij. Bak teveaksat ok pereaksat, nudolya va 5 ik 9 ato ( dem anamefa sona kum bertrafa saya ) atoar aze ant remi 24 viel di cwar.



Cadimafa ksevarura ke nudolye tid denackafa. Talteon zveri va fentugalaf bruxeem dir ; roneon va tel idulugalaf. Runda ke aftafa pakava isu orikafa riwe tir volafa kare taka ok lani altoki. Ticeon, pintara va taka.







## Yavaf ipom

**Koyapasik.** Tandeon, bak bareaksat az saneaksat, tol-kunoy ik bar-kunoy ipom ta koyarapa divtalad. Mal Sveriga is Suomia, va Balta bira remtalad aze va Istefa Europa az Franca vamootalad aze va Espana arttalad lize di fentugalud. Yon tum va Magriba is Alzaira kaltalad. Arte banar kril ke Mediterranea bira, ipom ke ronefa Europa ko wedaxo ke Nil bost koe Misra, ik Iraka ik Sudana talad. Telyon ke taltefa is istefa Sibira kal Barata ik Pakistana ok lentefa is istefa Sinia maltalad. Mali tena ke pereaksat is bak anyusteaksat, ipom kene ujiwa ik uzda ok moe miduxo jontikote blid ; miledje basped, pune va kotcoba dilizesa obrad. Ba beta elogara, ipomeem ve divtalar.

**Evodasa disukexa.** Bal batyona katanara, ipom va lulawera « stuteson » exaksad : laizon, tan wilt-botceson vetoz vulter, ton oral vane kelt, va yonu ivamu askir ise dile va werdtum divzaetawar aze vakrilon kabur. Malaskison va inafa tula, aryon ipom milinde toz linulad ; fure tum tegulawer ise lanedje kafkedar. Azon liza tenuwer numen koti zveri va darefa tegira kanarir. Koe Europa, yavaf ipom koe Skanda gibegamur. Loon geeon, geefa kima lente Balkan jaka is koe Anatolia is Mongola tigrir. Kle yavaf ipom koe antafa naelafa lenteka me soblir lize va meftavafa ruga is abdafa kimwa ke *taiga* aala is sperelaxo ginobar. Koe geeka, tulon koe Germana, kene tourka gibegamur. Koe fentugaluxo va afizcek koe miduxo gitiskir, ise koe uxaxo koe Espana is Portugala.

**Abrotce** : 1 m-.

**Aldo** : 4 - 7 kg-.

**Wiltade** : 2.00 - 2.40 m-.

**Blirugal** : 42 ans, ton gralomenuca.






Yavaf ipom va begama vevedur, i va begama leon pwertafa kare tigixo koe dambafa lava ok moe sid. Tir zuvda dem edgarda is gralka is werd, xakolafa vas 1 m- is ontinafa vas 50 cm-.



Bak balemeaksat, ipomya va toloyo ato krubeukafo is kretsakirafo gu lukoptelerke aze remi bar-sanoy viel cwar. Ipomoc ba tanoy ok toloy walukaf viel divatoawed ; arti tanoya tanka va atoxo azon bulud.



Oral ke yavaf ipom tir abrotcaf vas 10 ik 11 cm-. In ta ebidura va blot ( toa is fay is beza is salma ikz- ) faver. Dum ke lo ipomdunol, inia sotir pivotkirafa. Livafa bruxapa arte alto tid pakava ke wilt.



Aldo ke ipomoc tir vas 120 g- ba atoara. Koblisik taneon tir dem saya darpeon kadasa orikalukoptaf bruxeem, vaxeon bene taka lize blakeramon gulerkawer. Ipomoc ba mon 70 viel grudivtalar. Muvugalon, nope isk dem ebeltaf is batacaf nok keve berga, gu milgik zo walwir.

Yavaf ipom ton bargentimafa lospa dem 10 ik lo 200 olkik gitalad. Stasik fereon zo ikarundayar kiren inafa sugara va kaikfira va acagira ke gael tir gijapafa num gutrelawesa. Ipom koyason gilorapad numen ie male loon tanoye decitmetre zo rogilded. Sinafe kalie sotir vas loon 50 km- fuxe bartiv.







## Tovukol

**Bula wan tir.** Mali konaka decemda, kontan kareizud da tovukol ( sebadadunolam ke lentekafa patecta ) va granafa lamara rekolon kotaskid, i va lamara ton donafa ksera ko bira ok kuksa tenuwed. Geltruca nutir amidapafa ! Tire jontika tovukolinda blisa koe Arktika va mil giltireem me dikid. Balte kota bak lanyona tanda tujontikaweper aze riwe kotron griawir. Numen tovukolafa sanelia va akenafa otarura nedid. Lazava wan tid bula. Rugaf tovukol ( *Lemmus lemmus* ) ikwe tovukol ke Norga, male Norga kale Kola dega koe Rossia tigr ; to int va vunda ke ksera nekiyir. Tandeon, bat sebadadunol irubaxoarur : idulugalon va abdackafo xo ginobar ; fentugalon moe rodaxo loon tigr. Nume soluma-mon belon giliziwer. Voxen viele dunolota laumar, pune batcoba kaliapon zo katcalar kiren tovukol kene uzda ok kovoon ice toloya voa va sint avplekud kore kot sulem olkon skoyar. Grupujecked numen va lanyon rempujes va mantackafa uzda rowit. Voxen lanyon me tid lieke deksaf numen jontik wizuwed. Bata waltasa wizura gu ksera zo artazukayar...

Bak batyona tanda ke saneliafa divroidara, sinka kalion puskewer numen tovukol va gubefo tigixo gobulud. Jontik sulem bal bata aneyara va warzafo mulexo di xonuked, numen batcoba ape tir xanta ke nega icde granafa lamara.

**Idulafa nendaxanya.** Nekev vaf myot, nendatason va fentugalafa nustaca, lev noldacipia vafa vas konake sanoye decemeametre, tovukol va int gikosuxedar. Mil sebadadunolam va toyafa begama kum colk is werdki vevedur ; aneyatason va sinka, va lupaxama dere suxar. Bata levedafa kruldera osk gu fent is suka voxosk gu jontik wivgasik dum lakroda dem aultap is noldafa bugimoda is naelaf bresitol nendar.

### RUGAF TOVUKOL :

- **Abrotce** : 15 cm- + ault vas 1.8 cm-

- **Aldo** : 85 - 100 g-.

### AALAF TOVUKOL :

- **Abrotce** : 9 cm- + ault vas 1.5 cm-

- **Aldo** : 15 - 45 g-.





Iniapakirafa barenda tisa fliwaf dunol ke ruga ke Europa is Asia is Lentefa Amerika va jontikote tovukol gimalestur kotviele ban sin viakud. Roneon, barenda va tovukol vamootalar. Radimida al anametalar aze va int mosidar, pune va in kan kotceem gralomer aze toz lipur.

Koe wivgaf xim ke manbat fliwaf sulem, telyon ke tovukol ke toloya katca vas 83.9 % zo trasiyid ugale lan ilanacek ke viakura ke bat sebadunol. Iniapakirafa barenda tir millumafa dam yavafa barenda.

Talteon, rugaf tovukol ( *Lemmus lemmus* ) is talteon aalaf tovukol ( *Myopus schisticolor* ). Koe Europa, ban dunol koe Norga is Sverige is Suomia is Rossia blir, moekote koe kurbaxo. Valeveon oria ke tovukol : sebaadeem tid adolaf.

Rugaf tovukoltum lamas bal lana viakusa tanda. Ke yona vunda dikisa va manyona lamarapa, tela munesteyena gan Olaus Magnus sverigik bak XVI-eafa decemda lanon tir tana lotestafa tir : tovukol ticu rujod co lubed viele zivotc dur !



Tovukoloc koe begama. Tandeon, baroy occek dem aluboy ok tevoy oc rovokoblid kotviele sinka aultover. Bak darefa tanda abdi kona viakura, tovukol dace fentugalon nazbalked. Viele sanelia vantenu, pune jontik futik gan gadikyafa blixa zo conged.







## Rivebol

**Mesiakraf gu fent.** Vaf baynuk ke rivebol ( *Ovibos moschatus* ) gu nustuca ke fent sostar, koe moekote ginobana lofentunafa gola ke naelafa lenteka. Bak saz vas  $-27^{\circ}$ , arti sanoya wexa, yankasabesiki platini ko myot va  $+2^{\circ}$  bazer ! Rivebol tir paaslenackaf kev noldotcek ise sotir antaf moukol rodezavzagis kev lopof noldot. Batdume mo lindafa krimpa va rifa sinka rotanayar, liz nolda tsentena gan suka isker da rifa werd isu tij rotawid. Remi noldotcek, milgik gee suka is aname riveboloceem losiakraf gu fent va sint katanad. Guazafe rivebolye va rundaja kereled aze remi konak viel batinde venkon zavzagid. Myot ke rivebol tir kum abrotcaf imtum atris vomi lofentaf cadim ; fentugalon im ke geek kale kriza gitir. Valeveon saya va keskotapafa sostasa bada tuke vuca tazukar.

**Abrotce :** 2.30 m-.  
**Upene :** 1.30 m-.  
**Aldo :** cugon 300 kg-.

**Yorda ke okilik.** Rivebol dene tum dem tevoy ik anyustoy olkik ( cugon tol-sanoy ) gilton blir, i dene tum dem toloya ok baroya sulemya is abic oc is tanoye milgikye tise okilik rubas va musuca ke milkava. Viele idatcol vanvulted, pune va tumolkeem kabelcar aze taneon malplatir.

Titsuyafa nolda nutir dalafa volnaca ke bat alnaf veotes dunol kire tatcer da in va werd estutuson rovansar ( idulugalon va toa ke klodafa dzopoka isu anga gu sinka giloplekur ).


Batugale, rivebol koe Nunaata is abica ewala ke arktikafa Kanada dum Ellesmere ewala isu Graham isu North Devon anton wan lapter. Koe lanyona gola dum taltefa krimta ke Hudson bira, vugote lapter. Bata prantafa govitolinda koe Alaska tcon dimon zo koplekuyur radimida gan ayik zo tcabanerseyer nume zo awalkopeyer.





Idatcol sotir antaf wivgasik va rivebol ; va merodenendas riveboloc ik sostayan ik axaf ik klaarsaf sulem anton konarir. Lente idatcoltulum, rivebol va ordaf frez vanikatcud :

rivebolye aname rivebolya is oceem va int rundad, va sint keveon licad, takomad nume va noleem kev dillfusik atoed. Numen lente man oblarot dem leltorkirafo jo, idatcol gonodimelanid.



Nolotsa tir gasitafa : walzaf levak prosilkoraf tir tcourtaf. Abrotce ke nola ke milgikye tir vas 65 cm- ise ke milgikya vas 35 cm-. Ba klaa vas san-anyustoy aksat, ixam tir vas 18 cm-. Kota inia sotir batakaajafa, dem toloya mantafa kriza.



Bak pereaksat is anyusteaksat, to renacadim tir. Voxen rivebolye va sint ixam abdion toz ralentad : kevelik vajiked ise va sint tizon vordavad. Oc ( sotre tanoy fuxe rivebolya ) bak balemeaksat ok alubeaksat diretandon koblid aze arti abic bartiv grup-upenyed ise rodeliziwed.

Dile rivebol va voa ok uzdama idulugalon remlanir, bak cadim edje inaf myot tir trelaf ise kalion turodower. Bak lanyona tanda edje fentugal tir popof, pune tapeyes sid va awalkera ke jontik sulem nekir, nope kildera okkiren sin va sinka leve tabpada mea rovvansad.







## Gyrfalco flaweza

**Gazafi zveri.** Riafa *Gyrfalco* flaweza dem batakap bruxeem ke Nunaata, tigisa koe gazaf aboyikeem ke Mialukugal is banugale tisa dalaf kevlík ke befoltafa flaweza, va kazawara va oluafa torigira webeyed. Bak 1396 konak francaf jiomik gralomeyen gan Bayezid I turkaf gazik, ika san-toloya batakafo *Gyrfalco* flaweza zo tunuyayad. Mali XV-eafa decemda, batmani zveri koe dobulaf tegiv ke Rossia zo miwad ; dene aboyikeem ke Franca bak XVI-eafa decemda, tev-sanoy korik va bar-decemoya flaweza ke gazik tanon viunsud ! Jontika duga ke *Gyrfalco* flaweza va vetcoyera ke lo gazaf aboyikeem riweyed, neken befoltafa flaweza kevlík sotir lokaliafa gu wegona viele van wivga estobar. Wori, ke bata toloya katca, flawezaya sotir gijafa is gamiafa loon dam zveriye.

*Gyrfalco* flaweza va valentexo ke taiga aala is dalon ruga ginobar, koe azeka lidam meftava kale ontine vas mon 900 m-. Gitir deblitafa ; neken lana flaweza valentu Nunaata isu istu voxis valentu Amerika tici idulugal lamason getalad. Voxen sinafa koyara tandeon me tir lidabrotcafa. *Gyrfalco* flaweza valente Europa is koe Sibira is Alaska is Kanada is Nunaata voxis Islanda belon begamur.

**Fliotafo atoxo.** To kene krimta loviele zo kakever kire va pistafa dzeta ta atoxo manlize trasir. Kota tolonga va tawavo welmotafo vas 60 ik 600 km<sup>2</sup> ok dile loon malsaver. Va intafa sinka is tela ke oceem koe bata vema trasir. *Gyrfalco* flaweza va begama me vegedur. Flaweza, tici balemeaksat ok bak alubeaksat, ko suxomama fasiayana koe tawa bravon ice butama, va baroyo ok balemoyo ato batakablafofafo is kretsakirafo gu lerke daykar. Voxe va kono atoxo jovleyeno gan ari zveripi oku lizuxo jontikviele impavantar numaze moe vokliba ke aal ok gravida ke kiria va int inker.

Dum aryoni zveri wivgasi ke naelafa lenteka, *Gyrfalco* flaweza vas aultove dem wivga rupteper. Tod tanda enjapafa gu wivgeem, jontika tolonga me nazbalked.

**Abrotce :** 53 - 60 cm-.

**Aldo :** 0.9 - 2 kg-.

**Wiltade :** 1.20 - 1.35 m-.

**Blirugal :** 19 tanda koe gralomexo





Bata toloya noldafa nitca ( *Lagopus muta* ) gan *Gyr Falcon* flaweza su zo onsed. Bantol kan inaf kotceem al zo gralomer aze fliton fu zo basbruxar. Toloya nitcinda blisa koe Arktika tid dalafa wivga ke flaweza : koe Alaska tid vas 89 % ke inafa malestura ise koe Norga dace cugon 96 %.



*Gyr Falcon* flaweza va ipomdunolam is lofta is krepay is nudol is prokla voxis sebada-dunolam dum tovukol dere malestur.



*Gyr Falcon* flaweza va gemafa brucka ke kaliafi zveri « italon » metalasi dir. Kadime oral-otsa, ticeoral va toleafa demi adalafi ke flawezapeem dir. Axackaf inieem va nubegara va wivga oralanon aytayana nelkon zanudar.



*Gyr Falcon* flaweza lolenteon blisa loote tid riwe koton batakafa ; tela begamusa drume aala tid loeke orikafa. Wal bat toloy lugava ord, lukoptafa inda soe krulded ( talteon, flaweza dem orikaf bruxeem ).

*Gyr Falcon* flaweza va konaka amidafa tcabanerinda malsaver : onsetsen va wivga, va sid drumotalar ; oke dum battode, poke kiria lize bargeltafa lofta ( roneon ) begamud, pune va yono jotafo lakro ( talteon ) lasugaloyar.







## Noldafa bugimoda

**Batakaf murtoy.** Noldafa bugimoda tisa tan logija-rotif bugimodunol ke naelafa lenteka, koe arktikafa ruga ke Eurasia is Amerika blir. Voxen inafa tigira kare aultove dem abdualbana wivga ( tovukol ) oku riuca arapeniwer. Tulon valente Kanada moe Baffin ewala, tanoya bugimodafa yasa dem lerdoy oc is gadikeem va 1900 ik 2600 tovukol bad balemoy aksat rovoraweyar, ugale bat sebadadunol koe ruga viakud. Remi aluboya safta tiskina koe atoxo, tanoy oc va mon 140 malestur, trabe vas mon 11 kg- ! Bugimoda tir pockafa ta tcizara va derokafa rekola. Tire atoapar ugale wivga aultoved voxe tod riuca riwe me atoar. Ison bat listaf batakaf murtoy vas tovukol kotron me rupter ; kire va aryon sulem dere malestur, i va jotaf libakol voxis dalon jontika zveriinda : nitca is wulpa is proklaci is ipomdunoloc is nudoloc is aryon zverio.

**Bruxafixupu.** Bugimoda tir gundafa gu bruxafixu ise tir kalvekafa gu fent larde oralotsa is kotceem is iteem tid antafi bruxiskafi altoki. Bugimodaye va riwe kotron batakaf bruxeem dir, solve bugimodaya va jontik orikaf nok keve aftaf ludev atouer. Bak lanyona tanda ugale bugimoda jontikote tid, jontikbata va xantafa coyunta bulud aze va logeefa gola tolgenison kaltalad. Wali 1833 is 1950, mana tol-san-anyustoya tolgenira koe Lentefa Amerika dilizeyed. Bugimoda va geeka ke Kanada is lenteka ke Tanarasokeem arttalayad. Fentugalon, ant zveri abicote moe nazbalkexo koe orika is fent zavzagid. Arak keldur ise keno bostaf krant va taiga aala kotalar.

**Abrotce :** 55 -65 cm-.


**Aldo :** 1.50 - 2.0 kg- ( bugimodaya sotir pwertafa loon dam bugimodaye )

**Wiltade :** 1.50 m-.





Tovukol tir dalafa sinka ke bugimoda. Ina va sin kadbue tawaz pitcar voxo, viason vamootalason va ruga, dere tcabaner. Bati zveri me tir bugimodunol anton mielaf : bak pereaksat moe Baffin ewala edje awalt dun dur, bugimoda bak afizcek betviele tcabaner. Inafa tegira moni miazis is miamiel soe tuviawer.



Iniapa ke bugimoda sotir otsafa gu pof kotceem abrotcaf vas ide 3 cm-. Toloya kuga ( tum dem tritafa bruxa ) aname oral tid. Toloya ita keve lesay tid dem litoka vawale maserk kum niskama nendasa va bataka ke ita.



Atoxo moe juro tigr isen inaf kor tir dum suxoma koe ruxeem. Ato bak alubeaksat ok teveaksat bad tanoy ok toloy viel zo atoad. Larde cwara mali atoara va taneaf ato zo tozur, pune koblira tikewed. Arti 30 viel, oc fofkon toz talad.

Onseteson va wivga, bata bugimoda vion talar. Gemeltgemelton tictalar oke tittalar oke meliziweson vamoetalar. Nekev awiafa strokuca, tir tuzackafa gu gralomera va zveri is sebadadunolam. Arte loon tanoye decitmetre male sid zo rotcaluter.







## Bedakol

**Kotliz koo mefta is krant.** Bal sinafa lamara wal ruga is *taiga* aala ke istefa is ronefa Sibira, bedakol ( *Rangifer tarandus* ) va vakor dum bost is dace welduga mantafa vas konake decitmetre meklabuson rempujed. Isen kotote koe Sibira, 250000 ik 300000 bat prantaf sulem tolon tandeon koyad. Bedakol ke meftava dum milkatcik ke ruga gilamad nume va ontinafa gola ( vas 1500 ik 2000 m- ) bulud. Voxe kotote me lamad kiren lanyon koe aala dun blid.

**Pinapaf volnik.** Ba cadimany, valpok is comafa nefta viakusa koe ruga va bedakol dildud ise tatced da sin romalestud ise dace va int rotilded ! Batdume veotes sulem lasudivvawad, sinton katanason moe mazdafa noldapozla zavzasa nekev awalt. Idulugalon, bedakol va fedaxo kaaneyad lize suka dur isen beza abicote tid. Batdume koe krant ok wedafa tcelda ok krimtafa ruga ok moe krimpa lodamon tigid. Kot-cadimon, va mon 120 ruxinda malestud, don berdava ( vas 50 katca ) dalon tisa.

Fentugalon, kot bedakol va sinka vas 4 ik 5 kg- vieleon estur ; kan tigapafa kriza tod vafa nolda vox kan taka tod gemafa goafa bada vaon divnoldar. Idulugalon, va werd is veruga voxis toa ke cirdata ok dzopoka. Bedakol wali lardeaksat is santaneaksat nazbalked. Tazukara va aotcafa milkava tir taneafa bazexa. Bedakolye lyumad enide tatced da kevlik va runda vannarid. Arti batyona doaliera, barmeem ke lanyon sulem zo ariser. Vomion bedakol al almotced aze va fentugalaf aftalukoptaf im al did, i va im dile riwe batakap vaxeon keve ge is inieem is taka zavzasa loon orikafa. Abrotce ke imolk ke ge tir vas 9 cm-, is ke yinaxot vas 30 cm-. loplekur.

**Abrotce** : 2 m- ( + ault vas 20 cm- ).

**Aldo** : 100 - 220 kg-.


**Upene** : 1.10 - 1.40 m-.

**Blirugal** : 15 tanda.





Tandean muvugalon, bedakol va ruga bulud lize sinka turiawer. Va aalafa ruga is taiga aala artanid lize bravon ice noldot di tigid ise lofakon di romalestud. Bata lamara vas tanoy ok toloy aksat kare moolanina soluma ( 200 ik 750 km- ) jijar. Bedakol keno amidackaf zalor ton decita liziwed. Viele va mukot artlanid, pune ton tum tcastawed.



Bedakol va mantapaf krizeem tufakas va lanira moe tulwafa ok xetafa tawova dir. Nekev intafe ontine ( vas 1.30 m- ke kota ), barmeem tir aldof vas cugon 10 ik 12 kg-. Gan bedakolye lidam bedakolya zo dir aze bak santaneaksat ok santoleaksat sye akeoyer aze wali balemeaksat is tena ke anyusteaksat di gin atrir.



Aldo ke bedakoloc tir vas 6 ik 7 kg- ba koblira bak idulugal. In arti alubka ok tevka va gadikya roderadimelanir. Muvugalon, va inaf vrod kulapaf gu sum ( 22 % kapbure 3.7 % ke jaftolaf vrod ) wan ulir. Va toloy ralkam moe taka rowit lizu ba klaa vas mon tanoy aksat, barmeem di divnir.

Bat bedakol va estutuna berdava grifuner. Kan krizeem, va noldabada vafa vas 50 cm- rosuxar. Voxe gubeon va fakaca kaaneyar nume va xo dem mevafa bada loon nobar. Nekev inafa zalera gu noldaf fentugal, wavgon liziwer kotviele noldabada tir vafa vas 80 ik 90 cm-.







## Naelaf bresitol

**In va kotcoba impavantar !** Naelaf bresitol ( *Vulpes lagopus* ) tir lumamaf govitol ise valente Eurasia is Amerika blir ise kare cadim irubaxoarur : va idulugal koe ruga is arktikafa ewala tiskir ; voxe kabdi fentugal, va aala ok aalafa ruga vanlanir. Koe Sibira, naelaf bresitol va lo 125 sulemafa katca is 25 ruxafa katca malestur ! Sebadadunolam ton dalon tovukol va 99 % ke kotafa sinka dile kaatoed. Voxen bak cadimany va ato is zverioc ok milgafi zveri almotcesi num volrode-talasi jontiktode loplekur. Va lospa dem tcubay ok lakro ok lofta belon nobar. Nitca ( dum tela vamoeon gralomena ) va fentugalafa wivga moekote tadled. Idulugalon, kabay is beza is lonadunol is tulwadunol toleodon yordad, vaxede sebadadunol turiawed. Bresitol va awalkoda ke bedakol awalkeyes nope ciondawera bak fentugal dere impavantar voxise tukatcatorawer larde va ikseyen milkatcik malestur. Va vebdi is voja dere me ikudar. Tir blottoraf : va kotcoba rotestur. Naelaf bresitol rodegetineper, ise trasitison va blot, va solumapa exuler. Edje aelakola gazar, pune va lamara en bokar, ont van *taiga* aala geon, ont van oprukxo lenton.

**Gelawacka.** Tawaz tis luva ke bresitol tir dem remak vakrile mandi ok krant ok moe arestafa temba ke uzda ok kene bixefo juro ke ruga. Bata brava bak konaka tanda jontikviele zo kereler ise dun zo senur ( dace dile remi konaka sanda ) nume vas 2 ik 80 bexoda is lupaxa abrotcafa vas 8 ik 9 m- tere ruldar. Toloya yasa va bata gelawa dile milugalon kereled, i va gelawa welmoton ice 100 ik 200 m<sup>2</sup> ok loon. Koe lanyono xo dum ewala, tawaz moe tawovanok mantaf vas 1 ik 2 km- kene bira vegungon tigid.

**Abrotce** : 47 - 60 cm- ( + ault vas 25 - 30 cm- ).

**Aldo** : 2 - 8.5 kg-.

**Blirugal** : 14 tanda koe gralomexo.





Fentugal tir cadim wupesis va naelaf bresitol. Estuson va betcoba, dace inton tuvaleason va bedakolafa divluja, in lasurembli. Batlize sume batakap rupol aytayas va spedol tigr, ise impavantatason va povi ke inafa estura, va griaelera ke atelatorikap keon ker. Bata linulara kimbase va tela ke nopalol koe meila jupar da bresitol leon cuuwer. Vele zivotc dur, pune va luva suxar.



Oblaka ke naelaf bresitol tir trelapaf. Idulugalon, im ke lo bresitol tir moeon lukopta-lerkaf is leveon batakapaf ( ticeon ). Fentugalon tubatakawer ( titeon ). « Faltaf » bresitol leote tid voxhe va flemaf ok onikalukoptaf dem falte ( vasizeon ) tandon vided.

Bresitoloc bak alubeaksat ok teveaksat arti ocaga vas mialukon 52 viel koblid. Ota tir vas anton 3 ik 5 oc tod rifa sinka, voxhe vas 8 ik 12 ( dile dace 20 ) tod aultove. Aldo tir vas 60 ik 85 g- ba koblira isen abrotce vas mon 17 cm-.

Bat naelaf bresitol va prokladi vanbures va toka pu zverioc lagralomer. Voxen zveri divvawar numen in va ara wiga fu gonaneyar. Milgafa prokla abicviele tid kosafa gu naelaf bresitol, vaxeon koe lanyona gola ke Kanin dega koe Rossia.







## Idatcol

**Mecues vultesik.** Abdufiyison gu krijafe ie, idatcol (*Canis lupus*) va opranafa datuca ke arktika-xo metulegaweson exuler. Tuke belafa is kaliackafa laniga, va cug lokaliaf sulem tere sye lajuvebidur. Koe Lentefa Amerika, lani xali va 72 km- bad tanoy vielcek remlaniyir ; koe Kanada ari va milkava dem bedakol keno loon 300 km- laiteyer. Bat atelatoraf govitolarf remi toloya safta bal lanira kali tcedera ke tcabanera grugetiner. Mantode tir estupus : bad baroy bartiv, san-aluboy idatcol va acku ke tanoy bedakol vas 270 kg- koartokayad ! Idulugalon, va sinka vas 2 ik 4.5 kg- mialukon vieleon giraweyar.

Tod aultove dem wivga, idatcol ke ruga is tela ke *taiga* aala va arapeniwesa malesturinda dikid ; va sebadadunol is prokla is kabay ( tulon krido is termil ) is moukolam gralomed. Fentugalon, idatcol ke ruga, dem aftalukoptaf im, va bedakol dalon blidad. Va wivga narackad ise va tela loklaafa ok akolafa ok tcunafa dildud. Koe amerikafa aala, va wocol is cpogoloc dere malestud.


**Laiten !** Laiten gan ayik mali jontika decemda, idatcol koe Europa lokon al griawir. Voxe golde beya is prantuca, wan blir ; inafa ota vas vunta koe tamava zo uldiner, don mon lik koe Rossia. Valente bata patecta, idatcol kale kima ke naelaxo tigr isen moe jontika ewala dum Vaygatc is Kolguyev is Vrangal is Lyaxov is Novaya Sibir zo murobayer. Mali lekeugal, ayik va idatcol gu forteyfama is nyagaf is udutaf govitolarf torigir. Wori in malestutuson anton aytar isen inafa linulara tir rotuvapafa. Dareke-ugalon idatcol dildus va ayik ape tiyid bresitolakoles is gamdarulik vey vakol is idatcol. Neken, tod dikote wivga, idatcol va bonol ruzader ise va wilxe guiner. Bandume jontikkane zo lagawalkopeyer : kan zelt is ikse is jiva is dace onkara kan kulirna. Tcabanestik jekun gan inaf myot tid blodaf gu inafa griawira.

**Abrotce :** 1.0 - 1.6 m- ( + ault vas 40 - 50 cm- ).


**Aldo :** 27 - 54 kg-.

**Upene :** 80 - 100 cm-





Idatcol va cpogoloc diltutson al vanlanir. Voxen gadikya nimatkadison yatesir. Idatcol moi skaya ok onkara va wivga gralomer. Idatcolaf aplec va bedakol sol tum jadion latuantar aze anamatcer aze balier. Idulugalon meestuyuni povi ke cewa nover da mayevol ok lerkaf rupol ok bresitol ok gedrafi zveri ( iniapakirafa barenda is gazaf kilz ) drikon malestutud.



Koinga ke idatcol ke ruga tir abrotcafa vas 12 cm- is mantafa vas 9 cm-. Talteon abdueinia ; roneon radimeinia. Prijust sotir dem 42 talga. Idatcol kan tila is tirka ke ault va intafa eruca kabdunedir. Talteon dratcera ; isteon gruidera ; roneon auluca.



Koe tawaz, sye tigis poke lava, idatcolya va 3 ik 6 oc bak alubeaksat ok teveaksat nazbar. Ba koblira, idatcoloc va vaf lukoptalerkaf myot dir ise tir wiiskaf aze arti 9 ik 12 viel itafenkur. Arti 45 viel zo ulkoyar, isen inaf aldo arti balemoy aksat ixam tir vas 14 kg-.

Xali vas tanoya tolonga is inaf oceem is aryon milgaf idatcol tis leon tandaf sye ruldar. Dile lanbane sulemye va rictula ke « okilik » ilnaled. Batlize levemaf idatcol kabdue an idatcol jivotnedison su senyar, neditison da va inafa moemuca kagrupep num batkane pokoleson da me fu zo diltur.







## Naelaf nankey

**Alitasiso ervo.** Kotviele naelaf nankeyoc ( *Fulmarus glacialis* ) men grutalas zo mazuker, pune va keskotapafa nendaxe sodir : va puntakorafa plawa ( tisa lan uvoonaf edzosiaks ) kal soluma vas 60 ik 90 cm-kevkabur, i va plawa disa va linvesa dakelaja jupasa da lujdik loviele dimetalar oke dimelanir ! Va logajayani povi dere grudivplatir ! Nankeyoc moe krimpa ke mefta ok nilafa grvida ke kiria vamoe bira koblir. Voxe moi maltalara va « begama » anton tisa suxomacka koe pist ok tawa, va lavok kaltalar lize yon decitoy milkatcik ked. Moe Devon ewala valente Kanada, toloye vudime dem nankey vas yoni decitoyi zveri ruldad, i vas zvri kerelesi va raporafi krimtaki vas konake decitmetre. Ton durefa granka, aneyatason va sinka, sin kene krimta maltalad aze dimtalad, aze vamo bira iltalad. Banlize dere, va tcastafu viakupu kene yone sanoye decitmetre tazukad.

**Abrotce :** 47 cm-.

**Aldo :** 600 - 800 g-.

**Wiltade :** 1.05 - 1.12 m-.

**Blirugal :** mialukon 16 tanda.


**Darsik ke naelafa lenteka.** Iluon, naelaf nankey ( *Fulmarus glacialis* ) nope lukoptaf is batakap bruxeem vas lofta ok lakro vektar. Neken kaliapon katcalat da wilteem sotir nilaf ise otseem me tir ton adalasa ebeltafa uka. Isen viele zveri va int aykar, dojera bam tir merotisa kiren ini me ranyer voxe mo inieem senyar nume abdulanitison gempon impur. Kire nankey va azekaxo megrumaltalar, pune moe ticuk kottode begamur lizu ko vlarde va int di rovoanmimar ise di rowiltbotcer.

Nankey tid ke toloya kseva : bat varon orikaf lukoptafaltaf ( vamoeon ), ban loon aftaf. Neken sin kotote tid ke mila katca, isen bata amidaca va klaa ok ikra somedikir. Nankey tir tani zveri lodilon lenttalasi larde va laksiwak vas 81° koe Nunaata arttalar. Tir lonobafi zveri ke Arktikafa gola lize remi kotafa tanda dile zavzagir. Fentugalon, pokon gilamar : valent Atlantika welfa oku Pacifika.





Nankey va onasa tota giradimetalad nume batkane va aytcak ke kabay kadiyin ko bira impavantad. Aname tcabanasa tota aytayasa va megenol ik odayol dere va sint jontikote kabelcad enide va sumki ezasi moe lavek impavantad. Nankey va spolk volpen moe lavek dalon malestur, voxis bakayani ok awalkafi zveri is aboka is tulwadunolam.



Do ara nankeyinda is tugolek is tugol, naelaf nankey tir ke lana pilkovafa zverifa lospa : sin nope lan oral kum konaka nolafa pozla is dem toloya pimama dem otson pezolkeem gu arak ke zverieem zo walwir. Gelteem tir dem pivot.



Naelaf nankey va tanoyo ato dem tigaf kuld sokatoar, i va ato daykano mo raporka ok tawa. Jontikbato ato empawed ; aro gan lakro zo estud. Nankeyye is nankeyya remi 52 ik 55 viel cwad. Ba divatoara, nankeyoc tir dem batakafa saya vaxeon keve ge is wilteem tis lukoptafaltaf.

Bat naelaf nankeyoc va dilfura ke naelaf bresitol ilplatir, putcegason kev taka. Me ant tir batkane nendas : ara nankeyinda is tugolek is tugol milinde tegid. Icdé nankeyoc, kabura va plawa zo vodjunyur ; neken milgik xuyavon gikalkabud...







## Eurasiaf krepayot

**Cugunaykafa dirnura.** Lan sverigaf sulemopik van-laniyis va eurasiaf krepayot ( *Charadrius morinellus* ) cwas, va nuba lev ato lajufargieyer ise do zveri lajulevmadayar ; meexaksason va gyuca, bani wan tuidulayar ! Rabateyet da krepayotye ( kire to int cwar ) to tici cwara batinde va nubara isker. Neke zveri amidapon dile linular. Buluson va atoxo viele va lujdik geomason ok wiltbotceson lasugilrundayar, ise aultdivpaklason is temeson ieson anamelanir. Bak bata inafa lamara mal naelafa lenteka vage mediterraneafa gola lize va fentugal tiskir, eurasiaf krepayot va ayik jadion rodaxar.

**Stabrega ke darekeugal.** Eurasiaf krepayot koe arktikafa ruga ke Skanda is Sibira begamur. Voxe koe gundaf patectoy abicote dere nazbalker : meftavafa ruga ke ronefa Alp rodega isu Karpata is Ural is koe Mongola. Ko batyona gola, batinde va stabrega ke direkeugal kaatoer. Tire sulem ke ruga loon geeon bliyid. Ugale opra licaweyer, koe anameda vadjesa vas sinyona olegara lanote zavzagiyid, trabe koe meftavafa werda gundafa gu ruga ton lidawicka is tcastaf ruxeem.

Koe beto idulugalafo irubaxo, eurasiaf krepayot-eem ke Europa is Asia bak muvugal maltalar aze va lentefa kima ke letaxo reme Afrika is Pokefa Roneka kaltalar. Fentugalon, va man krepayot male Magriba kale Irana is male Sinay gola kale Iraka kle trasit. Mali anyusteaksat, sin ton loस्पामा vas bara ik sana maltalad aze bak alubeaksat ke darefa tanda oxam dimtalad. Imwugalon, krepayotafa tolonga va tawavo vas gedrafe divatce gikereled.




**Abrotce** : 23 cm-.

**Aldo** : 90 - 130 g-.

**Wiltade** : 46 cm-.

**Blirugal** : icle 5 tanda koe tuwava.






Yastuca ke krepayot zo grupecker. Voxen vanlanitison va cwasi zveri, xelkara zo gomalaskid. Batdume kontan viapon gonavlar ( talteon is isteon ). Viele drumeon tigr ( roneon ), pune va taneon taka az nuba gonabduplekur, edeme laxuvudesir. Bata dimura va inafa gibecwara pakon lotickir, voxen kot krepayot me milaskir.

Idulugalon is bak lamara, eurasiat krepayot va bezama ( nefta is mical is liostdunol is jaxok is nokta ikz- ) mialestur. Batlize toloyi zveri va toka ke valpok koe ujiwa volped. Lesko is varteba voxis voja is imwa is toa dilon yordad.

Eurasiat krepayot ko atoxo xakolafo vas anton 7 ik 8 cm- jonbaron sokatoar. Cwara vas 26 viel mialukon jijar, azen arti 26 ik 30 viel kadimi atoara, oc maltalad. Jontik atocok zo jovled kotviele fent dupur isen nolda tir vafa.



Valevticeon krepayoty ton fentugalaf bruxeem ; titeon ton idulugalaf bruxeem. Kevaxaks wal ebeltaf is batafaf nokeem ke taka is tel ke ast, va anamez ke brucka ariser ise va mastura ravaladar. Kota inia va baroy gelt sodir.







## Naelaf percom

**Va beballo mu zveri.** Idulugalon, naelaf percom ( *Oenanthe oenanthe* ) ke Nunaata blid koe gola lize mialukafa yanka tir vas 3° ik 8° ; arti toloy aksat koe Sudana ok Zambia tigid, lize ina tir vas 23°. Nekev kevaxaks, bata proklama nutid trabiangafa koe fent ke ruga lidam idulapafa awaltara ke afrikafa meila ! Cug naelaf percom ke naelafa lenteka kal bwafa Afrika gilamad ; icde tel ke ronefa Sibira, gokaiktalasa soluma tir vas kotwoyokon loon kunoye decitmetre. Neken locrakefa koyara tir tela ke nunaatafi zveri gokaiktalasi valento Atlantika welfa. Lani zveri koe Islanda soktad voxen jontikari va britanafa tursia mevukison kaltalad, battode exuleson vas 1600 ik 1800 decitmetre vamoo bira. Bati zveri tid kalvekackafi ta mana stuva kir gamiafi loon dam teli ke Eurasia isen sinaf wilteem tid lodabrotcaf. Abdi maltalara, sini va sumbalikeks zanudatas va «beballo» vanbeded ; bat belcetaks kaatoed vas 30 ik 40 % ke kotafo aldo. Arttalon va Britana, bad abic viel va int tukotrad aze vamo bira gin divtalad aze va Bizkaia pargalu kal Espana rontion kaiktalad oke kenotalason va krimta va Franca kaltalad.

**Letura is plencara.** Kadimi arttlara ke naelaf percom va gola lize sina begamud, pune tolonga va int tazukad. Percomye dankar, dile loplekuson va milaskira va aryonu zveri gu intyona cwa. Azon divtalar, va ontine vas 10 ik 20 cm- tictalar aze moi bata letura, ins luber oke altoguoter vieli pok maltalaxo va int aykar. Dile dere, tice raporka opelon dankackar. Koe ruga, kota tolonga va tawavomo arte mon 400 ik 500 m- male telo ke ara kereler. Batinde occek aulapon zo gaad isen adrafa sinka zo rotrasickir.

**Abrotce** : 14 cm-.

**Aldo** : 20 - 40 g-.

**Wiltade** : 26 cm-.





Bat braniol va naelafa percomya cwsa ulijdar. Va zveri welveson iper aze aytar aze vumber. Moi estura abica bruxa is empayan kulda anton zavzad. Zveri is ato va malesturinda ke braniol dilon yordad. Wivgasik va naelaf percom bak talara tir *Merlin* flaweza gibegamusa kimon ice ruga : ke 578 zveri estuyuni gan bat flawezadunol, 72 naelaf percom zo patayad.



Bak talara, naelaf percom, gu batakafa kretsa ke geak is ebeltaf is batakaf zoydaks ton trovgafe te rowin keve ault, drikon zo kagrupur. Sometir avlapasi zveri, kore inieem tir abrotcaf is prantaf ; tire drume sid djukatalar.



Leve raporki ok koe fe, atoxo ke naelaf percom tir kum werd is colk is zae ; koak gu bruxa is im is fema zo paedayar. Vegedura va bata kova tir grabom ke gadikeem. Aluboyo ok tevoyo ato remi 13 ik 14 viel zo cwad azen percomoc ba klaa vas 15 viel divtalad.

Bat naelaf percom va welduga bal sinafa koyarapa van Afrika remtalad. Nuve jontik di xonuked, kosaf gu zivotc wale Nunaata is Europa, kiren lanyon dile modomus va tota tid mazdapaf ike gebed.







## Faltalaridafa perca

**Faltalaridafa perca** (*Luscinia svecica*). Gubefa perca me tir antafi zveri mielon dankasi ! Koe taiga aala valente Europa is Sibira, percaye mielon is afizon kali tena ke teveaksat cwur. Inaf dank karolapan nope gedruca, vas jontika milaskira va aryonaprokla dum ciesta is drozba doburer. Ostik lane percaye va blakerafa tcala iste listafa faltafa kretsa ke ast did. Zveri blisi koe Skanda is Sibira kale roneon Bering vedil is geeon 60° wak tid antafi disi va bata uka. Faltalaridafa perca begamusa koe arak ke Europa va batakafa tcala did ; tela ke zveri ke istefa Asia tir flemafa.

Lotrelafa lamara gan zveri logeeon blisi zo sopud, solve teli lentefi ilon koyad. Kle faltalaridafa perca dem blakerafa tcala va kotafa Europa is Asia remtalad aze kene Niger bost ok valentrone Afrika ok koe Misra ok Ityopia fentugalud ; asiafi zveri vageron Sinia isu Asia is van Assam gola koe Barata talad.

Mone lentef laksiwak vas 60° koe Yakutia, bata zveriinda va dzopokatum is gorkatum moe domega ke voa vox lorion tcastafo klupaxo ok cirdatano bar viele titi teveaksat arttalar. Koe azekafa ruga isu meftavafa dere zo dizveyer.

**Antafa mielon !** Kadimi dimtalara, percaye tice aal toz dankar. Kotviele percaya pokotalar, pune ine ongir aze kal yone metre tictalar aze wilsotceson ton kevlubesiki tittalar. Ede ina doon zavzagir, pune moe sid va int wan kabdunedir. Banvielu bati toloyi zveri kali maltalara ta lamara bak anyusteaksat belcon di zavzagid. Faltalaridafa perca mielon is anton gikoyar ! Ise me kivar da va roz ontinaf vas loon 2000 metre is dace rodega remtalar. Moe soktaxo, va doma ke kelor nobar kire va abdaxo albar. Wori koe taya is ar omaf lorodaf siday dere zo rowir. Omava ke inafa malesturinda tir kum beza lopekuna gu leskomo is tulwadunol is voja, nume va yona tandeafo abrotcafa talara dizver. Tire ina fentugalon koe naelafa lenteka vol co lapter.

**Abrotce** : 13 - 14 cm-.

**Aldo** : 14 - 22 g-.

**Wiltade** : 22 cm-.






Bata faltalaridafa perca ongir enide va valpokindapa blisa koe abdafa werda di gralomer, i va valpokinda disa va toka vibasa va werdzae. Vangiyson, pu oceem sinkan gu beza vanburer. Idulugalon koe sverigafa Samia vas 65° ke lentef laksiwak, awalt ke miamiel nover da ina wan tir gavepon tegisa. Remi anton balemoy ik aluboy bartiv abdi vanafiz va int tilder.

Ticeon, toloye percaye ton muvugalaf is fentugalaf bruxeem tazukaweyes bak pereaksat ik anyusteaksat. Titeon toloye are ton imvugalaf bruxeem. Oc tid beretraf dem blafotamafa umica. Percaya tid dem batakafa larida wawale ebeltafa conyeta is ebeltaf astaf nok vox vuge falte.

Kare laksiwak faltalaridafa perca bak alubeaksat ik teveaksat ik dile pereaksat ( ronefa Sibira ) sokatoar. Percaya va begama kum rodaf werd leon aotcen gu tij is zae is agafa toa tugadiar. Koak tir kum gemapaf werd. Balemoyo ik tevoyo ato remi 13 ik 14 viel zo cwad.



Faltalaridafa perca blakerafa ( roneon ) isu batakafa ( talteon ). Sina tid percaye ton yerumas bruxeem adalaf gu begamaf cadim. Muvugalon, divatce ke faltafa kretsa illaumar isen uka tugaapawer. Ault kotcadimon tir blakeraf is beretraf.





## Dadjuga dem blakerafe ge

**Kotunafa belca.** Abicedje, dadjuga dem blakerafe ge ( *Calidris alpina* ) va xatoy maltalad lize va titkraytara keyed. Tictalad aze laizon toljoyad. Koafima remstir viele dimtalad, kabdunedison va willelvak. Waroldon ton kotunafa belca, gin tictalad ; azon dum vipa bene terok, sinaf milk gin tittalar abdida iltalar.

Tokkane bati zveri sinton poketalasi bak talara va sint lajumeklantawed ? Toktan va niarura sugdavar ? Men grupet. Rotir abici zveri va nyapesik ik okilik yordad numen arak va sinafa tiura vere milaskir. Bak lamara, dadjuga dem blakerafe ge va kalie vas 70 ik 85 km- fuxe bartiv rofir. Moe soktaxo, va siuda dem dile loon vuntoyi zveri tadler. Tildeson, siuda lente suka ranyer. Dadjuga dem blakerafe ge gu domegaf ipomdunolam is aryona dadjuginda katanad. Va sina vultesa wale *Numenius* oxiolek vegungon ice aryon koyapasik mal kotafa Arktika dere rowit. Maltalara van geeka mali acku ke anyusteaksat tenuwer. Lobat lamasik koe Franca ( 150000 ik 340000 ) is Magriba ( 200000 ik 600000 ) is kene krimta ke Britana is Nederlanda is Pokefa Roneka voxis vagee Tanarasokeem fentugalud.

**Betawesa kseva.** Fentugalon, zveri tir spupiafi loon dam bak imwugal : ast is ge tid loon lukoptafe isen ebeltafa kretsa ke jivot griawir. Inafa mal-esturinda kare cadim dere betawer : ini va felemoya beza divatoayasa koe ruga voxis varteba idulugalon impavantar ; va leskomo is tulwadunol trasin koe dremxo is vektas vas benev ok gerlanta, fentugalon gralomer. Dadjuga dem blakerafe ge tir ke lan katcatum begamus wale naelafu ivamu is lentef laksiwak vas mon 70°. Lizukon, va 84° wak kaltalar, tulon koe Nunaata is Svalbard tursia is Sibira. Geeon, va 60° laksiwak koe Alaska is Kamcatka kaiktalar. Inafa tigira tir aname kotlize lentef nael, vaxe Labrador gola.

**Abrotce** : 17 - 19 cm-.

**Aldo** : 45 - 60 g-.


**Wiltade** : 36 cm-.

**Blirugal** : 14 tanda is acku.





Kotviele dadjuga dem blakerafe ge kene bira muvugalon is fentugalon jonvieler, pune va lok ke bloteem koe abdaf drem ok ujiwa zavzasa radimi bulura ke lavok trasir. Avlamason abdulani is gralometeson va wivga, va oral blaganyamason titplatir. Arti vukira vas abic verast, gin abdulani. Aze gire vukir aze jontikviele akz-. Va yon decemoy sulemam rokodayar.




Talteon, wilt valevuon win. Poke levak ( talteon ), va uulaf bruxatum tigris arte pand wit. Inieem tir pivotiskaf. Abrotce ke oral ke zveri ke Europa is taltefa Sibira tir vas 26 ik 31 mm-, voxe ke teli ke Amerika is ronefa Sibira vas 31 ik 36 mm-.



Koe ruga kote tolonga dem dadjuga dem blakerafe ge va tawavo welmotafo vas tevoy ik peroy decemiray rojur lize atoxo tigr. Ino tir suxomacka vanmiaie ruxeem. Balemoyo flemofo ato beretron kretsaf bak teveaksat zo atoad. Remi 22 viel zo cavad azen arti baroya safta oc divtalad.

Dadjuga dem blakerafe ge tir mielon is afizon tegis ise bak titkraytaraf bartiv gimalestur. Va dik blot trasir kore jontikar ipomdunolam pokeon tigid. Kiren kota zveriinda amidon sokabduarbar isen tit amidafe aludeve va oral titplatir.







## Valpok

**Aelesu viaku.** Idulugalon koe *taiga* aala is ruga, suray dem valpok ( *Culicidae* ) va ayik is aryon moukolap moebidud : tulong koe ronefa Sibira, lana otara va 3986 valpok benaykayas va kontan bad baroya wexa patayar ! Aryona bezama, i neftima ( *Simulium* ), va fortay abdi atoara dere lagulid. Valey bata puilesa beza, jontika neftiminda cugote viakusa dere tid : koe ruga bad dere baroya wexa, loon 19000 beza ruzadeyesa va mil kosik zo uldineyed ( vamoelon wirapa va ayafa alma do toloy valpok ). Kotbata beza tid ke veem dem neftadunol, don dere gubefa nefta. Voxen koe naelafa lenteka, sinafu viaku va blira remi konaka safta tuvoldrikar. Efe koe durefo sukapaso xo vaon leote trasit ; arlize sin en tid ralaku. Ota dem katceem tigus koe ruga is *taiga* aala tir pinafa loon dam koe cwafa coyunta voxen kota katca cugote ruldar ; neken neftima tid gedrapafa loon dam koe sibirafa *taiga* aala.

Bak cadimany, cugbat sulemam va tec rujodap vamoe uzda is ujiwa tazukad. For ke tokeem atris koe lava va intafe tande dere guzekar : koe taltefa Sibira arte Ob bost, 3250 valpokrta fuxe lujorafe metre koe ujiwa ke aalafa ruga zo otayad. Tcafo lavaxo dace tid dem loote beza ( vas 6000 ik 7000 toka fuxe lujorafe metre )!

**Torklita.** Batdume sulemam kevu batmana ervolia dem puilesa beza giyated, numen batcoba tir me-gevasa. Idulugalon lamara ke bedakol gan bezafa tigira oku gracera zo nekipid. Voxen valpok va sinka ta jontiki zveri gizanudad. Batinde kota prokla isu ipomdunolam impavantapad.


### VALPOK :

- Abrotce : 0.5 - 6 mm- kare katca.
- Ato : 100 - 300 ato.

### NEFTIMA :

- Abrotce : 1 - 4 mm-.
- Ato : 50 - 200 ato.






Divatoara ke valpok. Talteon bezuk ; isteon, milgafa beza toz divlizir ; roneon, va int kotron su tunuyar aze va ridafa kruldera fu bokar. Voldum bezuk ke jontika beza, tel ke valpok tir roliziwes ise leve lavek blir. Va vala solesawesa koe lava. Milgik abicedje soblir isen ant valpokya puiler abdida atoar.

Tela logijafa ke bata toloya beza tir valpok, voxen bana tir neftima. Bezaya ke lana valpokinda va sokra gu ayik vas 0.15 mm- koalmar aze va fortey vas loon toloye deciteagrame ba kota puilera mialukon solimpar. Estura vas toloya ok baroya wexa jadion jijar.

Kadara ke neftima. Ticeon, milgik va bezukafa anamplekuxa zavzatasa koe lava divlizir. Titeon, taka ke bezuk kosuxedanaf koe drem, isen vasizeon toka ropilkomodana gu toloy intum zanudas va ebidura va toram ezas koe lava az malestumb.



Koe naelafa lenteka, valpok koe ujiwa idulugalon atoar. Batlize valpoktoka ke *Culicoides* oxi koe lava, dem gaeltrot arte kagaelasa pima. Toka bemotcapason grupujer voxen kalie tir pinafe. Toka di kadar bezuk.







Teni bat kuncas afizcek, va askiyina bora wauné. Va bata renakurera ( renamakurera ) gu ovarenara al gutogutoon lajupartazuká, i gu mana ! larde ova va runda vol kereler kiren battan va gunteem ke renakurera dene bantan anton sotrasir.

Resielon buluson, lodame Marthe batvielu va jinyona pirdara taruter, pune djiar da bak yon diref viel ta kiblara va aryono guto pomatá. Abdiplekú, voxe va vogara kredá, i va vogara da pu aguntanik vol kalitir larde antafa lazavanya artion rojupasa va dostera va batyono guto, ede bantan va Marthe en renar, to trakura tir da kotcoba gan ine zo nekir, is gan inafe puvecke vanpitise sinafe.

Viele dimdenlaní, pune ko disukera ke gadye fobelí da ine gu jinafa yatera ixam al zo givar. Tire ae va mecoba gruper ; tokkane co rogrupeyer ?

« Baix ! Jacques va bata mawa giltavecketer, » Marthe al kalir. Ba komodera pu int wan trakú da, ede abdi kenibera va kurera under, pune resielon en goguzekar arinde darevielon al askir. Luxe jin, betinde bata rezatcara co titir, gu inaf Jacques abdiston al zo jaxadá : va vidiamielcek koe bata soyutafa mawa trakú, koe « jinafa » mawa !

Va Direrielon koe vawila va piutebildesik cwe bures va twa icde gracera pitcá. Va ina mbi bulká, koucomá edje va arak ko twak ke cinafu polku mimá. Bata diotetca tir opelackafa nume vaon gifavé.

Gracera va olda sedme jin sugdalar da tí renas va Marthe. Roklé. Marthe anton tir yonta ta bata binkabema. Wetce kowazdera, grivuteyeson do Marthe va mempera ke nuyuca, to ant re djugrivuté aze tuponkatá. Nuyuca kalion fu vanpir mala.

Bemugal tir poki tena, voxen mayeson wí da jinafa vunguca me di zo pursar beka di zo djudivoldá, da va kona piza tenuousa va bata rekola djumé.

Tre blira dem milyona rieta is wira va antaca, ede kontan lujon vaon djumer, pune metan va gomilara ke inyona galpera sokatcalar. Efe va gadye me puidá ; wori va tela coba loeke ropuidasa djutrasí. Pula kotviele al tid rejdera tove jin ; Marthe is nuyuca parmon al tumerogindenad. Sonkecké da ede va René leon karolá, batcoba opelon tir to kiren ine va koncoba ke reila pu jin kimbar. Mejé isen bata kivara va jin dace altokon akolesir viele trakú da koe trawuca ke milbemikeem diretandon gire tigtí.

Xakon gu René, va intafa fogra kiewarson doon al walzilí. Acum viele ine deksafe leon dam jin dakter da va Henri-IV di zo divoldar, pune dere zo fodivoldá. Va gadye gogivá kiren ine karolatar da miv al kalití, abdi twa ke oldagadesik, i abdi twa gorestarsafa num melevdubietena.



To balemeaviel tir. Direvielon, i udorvielon, ké da gadye koe Paris tigr abdida va gadya walzé. Siak va skaltena balemka dene exoma loon dam warzot tubemuar. Azen ken Marne mallaní, lize Marthe al kalir da rotir kakeveter. Me tigr.Bexe. Ae kakeveson, jinafa rena va faja co lirder nume va gadye azon co di lyumá ; solve nope xefto vinustayaso moi vldarf is gabentaf vielcek, joomason dum fudjeson fu dimdenlaní. Den cin dimlaní grupeson viele lewe gadye gitigr.Kle « gruper ». Koe matela gozá, keson da gadye va jin volmiv rozar. Berya amliton vefad.Va koncoba diepiled. Tane berye, lulane gan xeftoara, kalir da ko mawa di golaní lize gadye senyer.

Vinustara ke puda ik dratcera co jupad da co kevié.Coba tir lorotafa. Gadye amlitar ; azon mevudeson, ton dace puda lozijnafa dam gubeon, kalir :

— Kle va tokcoba re xialal ?

Ikuza va jinaf iteem dum blatglemi me rodinvir nume koe taka felkur. Lent inafa kuranira, va tela jinafa nek merotaskisa co rokevú. Voxe kev mana zijnuca gonoxaá.

— Va coba dirgatal da gonaskí.

— Volgue, me ware rotuxadal !! Kotviele al iské enide tegil inde djumel. Wan askil !! Ape djukuraskitil enide di ireglieté.

Bak tena ke jotugal, dum ayikya djufolit da ikuza gu kotcoba grikidar. Gadye va ikuza dace me erur. Nope inafa vonuca, tí kinokaf gu gelkeugal is stekeugal. Kire pestalé da kalison va betcoba fu rotuxadá. « Icle bata rotuxadara va ine tolpozilir !!, ~ trakú, ~ vieli va warzafa puidera nekí. » Oke kre volgue, pu int wan djurotuxadá. To va kobara djupaskí, i va kobara cuesisa lion dam gozara is milinde iskesa va nuyuca pu swava num dure lotisa va Marthe. Stetá da djulingé voxe al me rovekalí. Ware gadye me mekalir, ant ede dene cin wan raveté dumedede koe olda co raveté, vox dem nuyuca ta lingera.

Viele gluya men tid delafa, pune tanafa gracera va kakevetca staper nume korik di zo drasur. Loon va Marthe trakú, pune leleon vaon trakú. Jinafa swava tegir milinde iteem icde ros ke rebava ke mawa sotegir.Loon wir, pune tere mea wir. Man volfoliks !Va kobara dace toz karolá. Me al rotuxadá, voldum kivara.

Viele koncoba divufisa vebar da va Marthe levungon gotrakú, pune reniskon askí, ton kexuca satolena gu coba co rotiyisa. « Baix !~ unt kalí, ~ mancoba co tiyir listarsafa. Va ilava is moeon kenibera belcon me rokiblá. »

Koncoba va gadye evodar. Twa ke oldagadesik me artnir. Ine va jin taneatomon nyaler, folison da va twa al solimpá aze va fastafa warzotara al stetá nume batkane va dalintafa driuca al belundá. Ae bata twa me krulder.Al folí da zo divoldayá voxe al roklé. Batdume ba tena ke tilderugal gadye va mecoba al gildar viele va twa ke oldapofesik al kazawav.

Bantel eruyur kase akoleyé, nume va jin tori diretanda di gobendeyer.

Tí daavaf kire va gadye tere rorwavé ise va pestakaf mekak ke jinafa tigira rotadonemé kire va Marthe mea forená neke wetce antaf renanik bagaliaf gu jin torigí. Trabe wan rená.



Ton bata renadebala tí viele arti tanoy aksat kaiki kazawara va twa kocenkasa va kurera, moni acku ke santaneaksat, va ganexa ke Marthe dimdenlanison trasí, i va twa dem bata toza : « Va rinafa amlitara vol gildá. Tokdume witison va jin me lanil ? Ape al vulkul da va jinaf gutoeem al kibalal ?...»

Marthe koe J- re soker ; inafa vawila vane titon Marne kuksa tigur. Kot twern va san-toloya garia iclo dazanir. Destá da tela inafa tir maneke gijafa. Ae, Marthe koe vegem anton irubar, kiren pilkotikeem is guazafa exoma va titak walzilison kopoled.

Viele ta kielestura artlaní, miel ixam dur. Ant dilk ledam ayaf tisik va tey razdar. Wison va bat dilk koafin gan memiltafa teyka dum runta, va firdtoza folí. Azilaf tuvel ke matela tir fenkumuyun. Va mana frayera destá. Va mamlesiki aneyá ; me trasí. Tere, vanticlaniyison va avlakeem ke rapsay, va ralpa ke ronef sidot djukutazé, lizu puda zo gilded. Guazikya va tuvel fenkur : erú lize Lacombe W-ya soker ( Lacombe tir reyolt ke Marthe ) : « Ticeon ». Va fogelom koe orika ticlaní, ardeotason is tanileweson is kivarson da xaka co sokiyr. Tazé.To Marthe fenkur. Ben inafa berga riwe ipé, milinde grupedansas korik divvawayas va bopelawera volins gilaskid. Ine vol co gildar.Ape krupter da nuvonagé, kiren abdi kotcoba erú dume « tey tir ».

— Kiren keson va rin, va tey kum krubinta koe keldega ke bontay al askí, aze keve afiga beliyí.

Kolanison va mawama wetce bontay dem abico guto is dem storn is tcalistap pibaf dum sulemim, i va mawa tuvwepana num nutisa bor, belcon tí kalaf isu vol, inde wenyapizusik wis va intafa drunta va rola gaverson kosmar.

Marthe kene keldega gin senyer, kalizison va reliez kan nornokay, is kalobrason da koni ebeltafi ki gu guboy me belcekar.

— Va dakela ke kruba rotir me albal ? To ikagdikeem va eksa ke intaf pilkot ke Vageexo mu jin volmiv al vanburer.

Marthe va pinta ke int nuparar, koe bata mawa tisa ke jinafa skura. Rotir bata ra va kotak vilar volsen ine gildajar.

Volson. Bat tey va jin felber, isen zo wivé wison da dum jin kotviele ine pester batkrilon teyedase, pune bankrilon rwoder. Inafa vumeltafa is govestafa gexata koe bata govitafi afi sedme jin nutir listafa loon dam betviele. Koplewenseson ko bata olkoba, bati afi va varafo po vider. Kotvielu illaní, pune miel dur numen va kono guto volins klantá.

Marthe me grutir rovae.Koe daava, wan tir govestafe.

Jinafa swava pokeon abicabicon tuglagawer, krupté da ine tir amidafe.Re lané da vaon mea rená, acum en toz rená. Pestalé da vol ropatavá ike vol roturbé, va betcoba batvielu is ware nuve rofiandena gan rena vol rotaskí. Vere pesté lokiewaf. Bata levgafo betawera va vofara ke bet artan co jupar : me sonké da tí renas va Marthe. Volson, mbi wazdé da jinafa rena mea tir numen nucanya fu ikaplekur. Bat renas siakap jupar da levgon dosté da kotara pestaka co tir gomilafa kire va kontan renas va ine co moxar, i va kontan godikis vox me rowis.



Wori, arcoba gu jinaf ageltucaf pestakeem co gocenkar. Weti konak aksat, kotviele va Marthe kakeveyé, jinafa drowigafa rena vol tatceyer da va ine malyedayá, da krupteyé da inafa locoba listafa vol tiyid mana, i locoba rumeafa. Re, ede dum ine me trakú, pune arse kiové. Kaiki duskuca ke jinyona jugemera, to gan pibuca ke lopofa pestaka zo coé. Pestalé da va betcoba abdiplekuyuna mea di rotaskí. Va Marthe toz tarká kire toz rená.

Kotsielon laní ; dace me djudjiá da ine va mawa di nedit, ike ware leon me djumerú inde Jacques va cinyono guto al krafiar. Va bata kotabafa aguntara anton jugemé, va alto uzeso senyeso poke keldega, ise me rovezeká, kivason da beta zatcara ke jin va kaluca co aloyackar.

Voxen Marthe va mila mempera grivuter neke ant fogrivuter. Va brunuca ko jinafa vunguca belir. Trakur da gan jin me zo renar, nume gestir da gu bat amlitaf bontay fure di zo argá ede va mecoba tikisa va jin co askir.

Stivawev. Va wazdera va kaluca guon maltrakú.

Poke Marthe kiewepé, laneson da va milcoba miledje trakuv, eke pulvira fotir solovafa, damo unt pulvira viele ant tit. Bata amlitara va bata kimtya anzar. To utcoruca co tir ede va goleba yoromafa lion dam ewa ok zatca co favé, miledje daboreson da mekara lorukuzafa co krulder.

Kotvielon ko bata kiewotafa stivara loloon tutitsuyawé, numen Marthe gestir da loloon argawé. Pester da djuprogaskirsir enide va jin di deaser.

Ton stokewes usuk, poke tey djukakeniber. Oken folí da keniber. Va moda yontar enide va meem anam jinafa berga plekur, aze divmodeson ton abdaf iteem pu jin kalir da gabenton su klokar. Me djupwader. Va inafa rolafa kenibera impavantá nume va inaf usuk isu berga isu anteyawes tcoreem pezidá, lowe vwalason medivmodatason ; voldum jontiktan folid, kotmana santara me tid talam ke rena vols tel loriaf talap sovidun gan ske. Jin, cwe, jinafa nuca konover. Wori toz piksepé kiren ant rena va roka tove ayikya sogetcar. Va rena co fiandé, ~ trakú, ~ vox metode kona dikira va Marthe. Ison, seotatason, dace djuprorená, kore daboré. Va Marthe jugemé voxe me narú.

Kotviele batinde keniber, ton taka altogisa va tana jinafa ma, blaganyá witison va inafa vola koanamana gu tey. Batcoba tir vefara va tey. Lanviele vanlanirsí neke jinafa vola va tela inafa me uzar, nume tí dum veel lowe kaiknis va poun seg num koimpan gan zat. Kas batcoba tir rola ke zat ok veel ? Kle va jinaf kutceem kev tel inaf almá. Wan itabuder, vox cwe dum kontan mekenibes. Kutcá, akoydan gan jinafa pirtuca solve ae to ine va jinafa taka kev art al vanimpar viele gu inafa vola al vanplekú ; inaf kutceem bak bopelara loyatkon me co kotcagir. Voxen me narú kase zo djugiwar oke doon gowizuwé.

**Oretlik koe alto**, ke Raymond Radiguet ( 4<sup>-eafa</sup> zixa ; diza titisa koe diref otuk )


Oretlik koe alto : berpot (1923) ke Raymond Radiguet francaf suterotik  
*Xanto : Le Diable au corps* francavon, kalkotavayano gan Laurent Lermigny, 2017.  
 Dotay : Kotavaxak dem Suterot.

Robelin banliz : <https://fr.scribd.com/document/358060704/Oretlik-koe-Alto-ke-Raymond-Radiguet>






# Tolnafa vajtota




**Toloya dalafa refa vajtotinda,** tid gulafa tolnafa vajtota (super-tanker) remburesa va rilafa tolna artu ba naav ke tamava kal bana,

is bortota vankolana gu kot delaf doleks. Sinafa vonera va tenekara va warzafe divtotase ckane al tuadnar. Kiren tolnafa vajtotapa batugale zanisa tid pwertarsafa nume va lo molt me rodekolapid. Va int grocelon gonekastad aze va bukelta kan stita gotuvlardad oke gotukotrad. Mila nuva ta vajara va umava tulon zo uner. Krilon winon, bortota vas tolnafa vajtota vektamar ; abrotce ke cewa va rembureri va cug bor nover. Bat nivaf ak va kaliafa basvajara dere novel.




⏏ **Doleks gu bor** ke vayackayan tazuk zo kobuded nume lodrikon zo rovajad.



⏏ **Dimfira ke pelaf ital** va droka ke bebalo vas bareaca co rokastar, num droka ke rembureri va doleks.

⏏ **Bebalo** va dro ke birafa rembureri yordapar. Tori direkeugal, pakon dimfison dim ital bato dro co zo rokastatar. Konaka bagalara kan ital warzon envan isu norisk al zo skud. Ital tid kum tianaf toaz vodjun gan vusiko is lizin gan melt ta cugafa savera va sukara. Fenkuson va toaz dum tel ke boretea, voy tod bopelawera is zivotccek lanote co zo taruteyed.






## ajjtota

Les supertankers, qui ont besoin d'une étendue de plusieurs kilomètres pour tourner ou s'arrêter, doivent manœuvrer avec précaution dans des eaux aussi fréquentées que celles du Pas de Calais. Pour naviguer en toute sécurité, ils sont guidés par satellite, radar et autres systèmes électroniques.


⏏ **Tana logijafa** tolrafa vajjtotapa ke tamava, i va *Globtik Tokyo*, vas 483664 decitor.



⏏ **Logijafa tolrafa vajjtota** rotid vas loon 400000 decitor, dem abrotce vas loon 450 m-. Va *Globtik Tokyo* tota gu *Queen Mary* koriktota ke 1936 vas 81237 decitor.



*Globtik Tokyo*, tolrafa vajjtota



*Queen Mary*, koriktota



⏏ **Cewa** ke tolrafa vajjtotapa tir gulon abrotcafa nume tod bopelawera drikon rojoawer ; mantode tolra anamgimawer nume va voyap ko anameda nekir. Bopelawera ke Exxon Valdez tota bak bareaksat ke 1989 va krimta ke Alaska kene 2000 km- fuyur. Vajjtota va zalor al arjoyayar, me malaskison va biraf vertot.

Tolna tir benelafa gu witafa tamava voxen inafa remburera kan vajjtotapa va torigirafa dratcera kev anameda kaatoer : divmimara va egeba ok razxa ko bira va blikapburedopafe egale rovonekir. Bopelawera ke Exxon Valdez tota grocelon ice Alaska bak 1989 dem tolra vas 45 celemoy inoc va biraf sulemeem apkayar. Malaskira va lofebafa musafa sabegara moe tolrafa vajjtota voxis gamedas azekos en tir vrebafa.



⏏ **Drig** ke gamedas azekos kan kulirna zo kobligar ise yateteson tod walta, va giwas ankit dere dadir.



## TELIZ

2<sup>e</sup> bu : Sulem ke naelafa lenteka

48<sup>e</sup> bu : Oretlik koe alto, berpot

54<sup>e</sup> bu : Tolnafa vajtota

56<sup>e</sup> bu : Kuda ke Aisopos

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

## Kotavusa virda

Virda kotavon sanelayana, nuyon is faston  
romalvajana is rorubiana is rotanamzilina.  
Ickriluyun rokeem. PAG / DE.

Internetxo : [www.europalingua.eu/KotavusaVirda](http://www.europalingua.eu/KotavusaVirda)

Bu : [www.europalingua.eu/KotavusaVirda/14-e\\_otuk\\_12-2023](http://www.europalingua.eu/KotavusaVirda/14-e_otuk_12-2023)

Sanegara : Santoleaksat ke 2023. 14<sup>e</sup> otuk.

Yunkexa is ewava : ewaveem abugaf gu roka ok  
nuyon rotamuzen ok rictayan gan digisik.

5

Loma  
ZVERI

SULEM

FR  
perroquet

## Zertek



Ticumasi zveri ke bwaxo, sodisi va  
demakoraf oralap is bruxeem fereon  
jonukapaf. Konaka katca va ayafa puda  
gruriwed.

kiiz - waikoy - zioskol - wil - zertek - prokla

## Wegidol is Zeus

Wegidol, rabateson da jaftolye va int gu noleem abdivodar, djumar nume dere lion roseotar.  
Batdume va Zeus kevlanir aze blikar da in va noleem di kozilir. Voxen Zeus, pan da in va int  
gu ontinaltopo is po me keldaskir ise ware loon galper, osk va loplekura va noleem vewar,  
voxosk va toloyi oblakaki dace gaber.

Batinde jontiktan warkon is djumason va artan disuked, me vofad da va intaf gunteem  
drasud.

Kuda ke Aisopos, -VI<sup>eafa</sup> decemda ( kalkotavaks gan Yurani Andergan )